

San Marcos

*Juan chë Ubayaná entšanga yojanabuayiyná
(Mt 3.1-12; Lc 3.1-9, 15-17; Jn 1.19-28)*

¹ Měntšá tojanobojaťsě chë tšabe noticiēnga Běngbe Bětsabe Uaquińá Jesucristbiana.

² Ntšamo bayté entsemna, chë Běngbe Bětsabe juabna oyebuambnaya Isaiás chabe librěšańe yojěťsayancá, ntšamo Běngbe Běťsá chabe Uaquińábioye ibojauyanama cha tojanábema ora: Minýe, atšbe abuayiynayá acbe natsana sěntsichamná, chë aca jabama lempe echanjaprńnta cha.

³ Entšanga ndoyena luaroca cha enduáyebuache měntšá:
“Běngbe Utabná echanjabo ca;
mo nda canýe benache tojtseprontacá canýe uámana entšá jashjanguama,
cachcá tšěngaftanga, cha jabama ainanińe tšabe juabněngaca šmochtseprontana ca” –cha tojanábema.

⁴ Chcase, Běngbe Běťsá Juan tbojanichmó, y cha tojánbocna entšanga ndoyena luaroca, Běngbe Bětsabe soyěngama abuayiynaye y entšanga ubáyana. Cha entšanga yojaněťsěťsnaye: “Tšěngaftangbe bacna soyěngama ngmėnaca šmochtenójuaboye, chca amana šochťsajbaná, y Běngbe Bětsabe benache šmochťshache. Chora cbochjúbaye, y Běngbe Běťsá tšěngaftangbe bacna soyěngama cmochanjáperdonaye ca.” ⁵ Nýets Judea luarocana chábioye entšanga imojánbocana, y

Jerusalenentsana n̄yetsca entságnaca, y Bēngbe Bētsábioye chēngbe bacna soyēngama jaimpáda chentsana, Juan Jordán ca uabaina bėjayiñe chēnga yojanēbáyana.

⁶ Juanbe entsayá inauapormana camellbe stjēnasheca y bobache yojanasnana; chapulinatēmēnga y tjañe méloye inasaye. ⁷ Y mēntśá entsanga yojanētsēsnaye: “Atśbe ústonoye in̄ya echanjabo, atśbiama más obenana bomná; chíyeca atśe mercedo taitsatobuajoñe, ni mo jotsejbiyana chabe shecochētjonēshentsa corriēja jajafjonama. ⁸ Atśna búyeshca cbondēubáyana, pero chē echanjabábeyecna, Bēngbe Bētsá bochanjíchmuachē Uámana Espíritu tśēngaftangbe ainaniñe cháuamashēnguama ca.”

Juan, Jesúsbioye tbojanabaye
(Mt 3.13-17; Lc 3.21-22)

⁹ Chē tempo, Galilea luarocana Nazaret pueblentsana Jesús yojēftsebecna, y Juan yojtsemnoye tojána; y Jordán bėjayiñe Jesúsbioye cha tbojanabaye. ¹⁰ Bejajoicana yojtashēbēbecna orna, tojánin̄ye celoca atēfjniñe, y chē Uámana Espíritu chábioye mo palomatemcá yojtsastjajuana. ¹¹ Y celocana Bēngbe Bētsá mēntśá tbojaniyana: “Acna atśbe bonshana Uaquiñá condmēna; acbiama corente sēntsoyejuá ca.”

Jesús tojanobená Satanás jayēnjanama
(Mt 4.1-11; Lc 4.1-13)

¹² Chentsana chē Uámana Espíritu Jesúsbioye entsanga ndoyena luaroye tbojanánatse. ¹³ Canta bnētsana te chē entsanga ndoyena luaroca tbojanjétana, y Satanasna yojanabó

jisháchichiyama. Chë luarentše tšátjaye bayënga imnajena; chentšana, Bëngbe Bëtsabe angelënga cha imojtseserverna.

Jesús tojanontsé Galileoca chabe trabajo jamana

(Mt 4.12-17; Lc 4.14-15)

¹⁴ Juan cárceloye tmojanëtámentšana, Jesús Galileoye tojesaná; y chiñe cha yojanabuayiyná chë tšabe noticiënga Bëngbe Bëtsabiana. ¹⁵ Jesús entšanga yojanëtsëtsnaye: “Ora tocjobuache, Bëngbe Bëtsabe amëndayana echanjóshjango. Tšëngaftangbe bacna soyëngama ngménaca šmochtenójuaboye, y chca amana šmochtsajbaná y Bëngbe Bëtsabe benache šmochtishache; y ainaniñe chë tšabe noticiënga Bëngbe Bëtsabiana šmochjójyëngacñe ca.”

Jesús tojánachembo canta boyabásenga beonga ashebuánayënga cha chamuastama

(Mt 4.18-22; Lc 5.1-11)

¹⁶ Galilea uafjajónaye tsachajana Jesús yojtsaye ora, cha tojánanyë Simón y chabe uabentsá Andrés; chatna atarraïëshangá ibnetsashbuëtsetšañe, er beonga ashebuánayata chata ibnamna. ¹⁷ Chora Jesús tojanëyana: “Atšeftaca mabata. Atše cbochanjábiana Bëngbe Bëtsabiana entšanga anguayata; y morscana, nñe beonga ashebuánayata ndoñe quešochátsmëna ca.”

¹⁸ Y cachora chatbe atarraïëshangá cachcá tbojésanaboshjuana y Jesús tmojanasto.

¹⁹ Más chcoye yojátaye orna, Jesús tojánanyë Santiago y chabe uabentsá Juan, Zebedeobe uaquiñata; chatna barquëshañe ibnetsotbemañe,

chatbe atarraiëshangá atapórmayiñe. ²⁰ Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peónraftaca y Jesúseftaca tbojtsanoñe.

Jesús, bacna bayëjbe juabna cánÿabioye tbojanbo-juaná

(Lc 4.31-37)

²¹ Chentšana, Jesús y chabe uatsjëndayënga Capernaum ca uabaina puebloca tmojánashjajna. Chë ochnayté, Jesús chë judiëngbe enefjuana yebnentše tojánamashëngo y yojóntša entsanga jabuátambama. ²² Entšanga imojtsenjnanaye ntšamo Jesús yojtsabuatambacá, er chama mo canÿe mando bomnacá yojtsóyebuambnaye, ndoñe nÿe ntšamo Moisesbe ley abuátambayënga imojanabuatambacá. ²³ Chë pueblentše judiëngbe enefjuana yebnentše yojtsemna canÿe entšá bacna bayëja uambayá, y chábeyeca chë boyabása yojóntša mëntšá uayebuáchana: ²⁴ —¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndétatšëmbo nda aca comnama, aca chë Bëngbe Bëtsabe Uamaná ca.

²⁵ Chora Jesús chë bayëjbioye tbojtsanácacana, y tbojanियana: —¡lytëca móbema y chábentšana maisebocna ca!

²⁶ Chora chë bacna bayëjna tojanma chë boy-abása ataque chaboshachama, jabuache tojanoyó y chábentšana tojésanbocna. ²⁷ Chama, nÿetsca entsanga ojanánënga imojtsemna, y mëntšá imojtsentjanaye: “¿Ndayá chca yojtsemna? ¿Canÿe tsëm buatëmbana soye? ¡Quem boyabása mando bomnacá y obenacá entsabuatambá, y chca, chë

bayějenga cha jtsamëndayana y chěngnaca joyeunayana ca!”

²⁸ Y betsko nýets Galilea luarentša pueblěnguenache Jesusbiamá yojtsótatšěmbo.

Jesús, Simón Pédrěbe uambén mamábioye tbojan-shná

(Mt 8.14-15; Lc 4.38-39)

²⁹ Chentšana, chě enefjuana yebnentšana tmojánbocana y Santiago y Juánoftaca Jesús tojána, Simón y Andresbe yebnoye. ³⁰ Simonbe uambén mamá šocá inajájona, jabuache calentóraca, y Jesúsbioye chě šocabiamá tmojanianyana. ³¹ As chora, Jesús tojanobeconá, chě šocábioye tbojanábuacueshache y tbojanatsbaná. Cachora chě calentora tbojtsanóbojuanañe; y cachora cha tojtantsbaná y tojanontšé chěnga jobuácuedana.

Jesús ba šoquěnga tojanashná

(Mt 8.16-17; Lc 4.40-41)

³² Chě te jetiñe, shinýe ya yojuenatjěmba ora, chě luarentša nýetsca šoquěnga y bacna bayějenga uambayěnga Jesúsbioye tmojaněnatse; ³³ y nýetsca entsanga běšoye imojobeconá. ³⁴ Jesús banga tojanashná, nýetsca šocana bomněnga, y ba bacna bayějenga entsanguentšana tojtaněbuacna; y ndoñe tonjanalesenciá chě bayějenga chamóyebuambama, er chěnga innatátšěmbo cha chě Cristo bétsemnama.

Chě judiěngbe enefjuana yebněnguenache Běngbe Bětsabe soyěngama Jesús yojanabuayiyná

(Lc 4.42-44)

³⁵ Yěfsana cabá cachěse, cabá ibetcá, Jesús tojěftsantsbaná, chě pueblentšana tojěftsanbocna

y entšanga ndoyena luaroye tojtsanoñe, choca Bëngbe Bëtsáftaca jencuéntama. ³⁶ Pero Simón y chabe enutëngna tmojána jetsenguanguama; ³⁷ y tmojtsaninÿena ora tmojaniyana: —Nÿetscanga cmontsenguá ca.

³⁸ Y Jesús tojanëyana: —Inÿoye cuajna, cam béconana pueblëngoye, chíñnaca Bëngbe Bëtsabe soyëngama entšanga chayábuayenama; er chama atše sënjabo ca.

³⁹ Y chentšana, Jesús yojánana Bëngbe Bëtsabiana entšanga abuayiynaye chë judiëngbe enefjuana yebnënguenache, nÿets Galileiñe, y entšángbentšana bacna bayëjënga yojtëbuacana.

Jesús, canÿa bacna nguayanánaca šocábioye tbojanshná

(Mt 8.1-4; Lc 5.12-16)

⁴⁰ Chentšana, canÿe boyabása bacna nguayanánaca šocá Jesúsbioye tojanobeconá; y joshaméntšase mëntšá tbojanimpadá: —Aca tcojtsebošëse, aca catjobenaye atšbe šocana jtsebojuánama ca.

⁴¹ Jesús chabiana tbojanongmé; cucuátšeca tbojánbojajo y tbojaniyana: —Aíñe sëntseboše. ¡šocana cbotsebojuaná ca!

⁴² Y cachora chë šocana tbojtsanóbojuanañe y tšabá yojtsatsmëna. ⁴³ Chora Jesús chábioye tbojtanichmó, pero puerte mëntšá tbojanmandá: ⁴⁴ —Mouena; ndocnábeñe quem soye cattsecuéntaye; nÿe Jerusalenoca báchnëbioye motsa y cha cochjinÿinÿiye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe

Bëtsábioye chama jëtschuayama, chca, nyetsca entšanga chamotatsëmbona mora ya tšabá cojtsatsmënama ca.

⁴⁵ Pero chë boyabásana, chentšana tojëftsanbocna y cachora yojóntša nyetsquénache entšanga yapa acúntayana Jesús tbojanshnama. Chë causa, Jesús ndoñe yontsobena entšangbe delante pueblënguenache jtsanana, ndayá nye chë pueblënga béconana y nyetsca chë entšanga ndoyena luarënguiñe yojánana; pero nyets luarëngocana chábioye entšanga imojánashjajuana.

2

*Jesús, canye jama ndobenábioye tbojanshná
(Mt 9.1-8; Lc 5.17-26)*

¹ Chentšana, Jesús Capernaumoye tojtanashjango; y entšanga imojátatsëmbona, Jesús yebnentše yojtsatsmënama. ² Mallajta entšanga chentše tmojanójoto; chë causa chë yebnentše ya tondaye más luare entšangbiana yontsemna, ni mo chë amashjuanentše, y Jesús Bëngbe Bëtsabe soyëngama yojtsabuayiynaye. ³ Chora tojanopasá, canta boyabásenga tmojánashjango, canye entšá jama ndobená imojtsaismana. ⁴ Pero ndoñe tmonjanobená Jesús yojtsemnoye cha juambana, tša entšanga causa. Chcasna, chë canta boyabásenga yebna tsbanánoca, Jesusbe tatsëtsoca batsá tmojánatëfjo y chëjana chë jama ndobená tjuashiñe tmojanëstjango. ⁵ Jesús tojáninye chënga tša imojtsošbuaché chë šocá jáshnama cha yojanobenama; as chë jama ndobenábioye

tbojaniana: “Sobreno, mouena; acbe bacna soyënga tcbontseboperdoná ca.”

⁶ Chentše báseftanga judiëngbe ley abuatambayënga imnatbemana; chënga chora mëntšá imojtsejuabnaye: ⁷ “¿Ntšámoyeca quem boyabása chca yojsichamo? Jesús ndoñe tšabá Bëngbe Bëtsabiana quenátichamo; mo chábioye cuafjoyenguangcá entsemna. Ndocna entšá quenátobena ínÿabioye bacna soyëngama japerdónana; nÿe Bëngbe Bëtsana aíñe ca.”

⁸ Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanëyana: “¿Ndáyeca chca tšëngaftanga ainaniñe šmojtsejuabná? ⁹ ¿Tšëngaftangbiana ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca’? ¹⁰ Y chca, mora atše cbochanjínÿanÿiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojaniana: ¹¹ “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

¹² Cachora chë jama ndobená tojtantsbaná, chabe tjuashe yojescñe, y entšangbiajana chentšana yojésebocna. Chama nÿetsca entšanga imojenjnaná y Bëngbe Bëtsábioye imojtsatschuanaye, y mëntšá imojtsichamo: “Nÿa ndocna te tša bëts soye chemuáisinÿe ca.”

*Jesús, Levíbioye tbojanchembo chabuastama
(Mt 9.9-13; Lc 5.27-32)*

¹³ Chentšana, Jesús cachiñe chë uafjónaye tsa-choye tojesaná; ba entšanga chábioye imojobecóná, y Jesús yojtsabuátambaye. ¹⁴ Chentšana yojtsataye orna, Jesús tbojáninÿe Levíbioye, Alfeobe uaquiñá, yojtsanotbemañe, entšanga impuesto atjanayacá inétsotrabajañe. Chora Jesús tbojaniyana: “Smasto ca.”

Y Leví tojantsbaná y tbojanasto.

¹⁵ Tojanopasá, Jesús Levibe yebnentše yojtsesaye, y banga Romocama entšanga impuesto atjanayënga y inÿe bacna entšanga, mesëshentše cánÿiñe imojtsetbiámana, Jesús y chabe uatsjédayëngaftaca; er ba entšanga cha imojústona. ¹⁶ Chë fariseunga y chë ley abuátambayënga, chë entšángaftaca Jesús yojtsesama tmojáninÿe ora, chabe uatsjédayëngbioye tmojanatjá: —¿Ndáyeca tšëngaftangbe buatëmbayá, entšanga impuesto atjanayëngaftaca y bacna soye amëngaftaca yojtsesá ca?

¹⁷ Jesús chca tojanuena; as mëntsá tojanëjua: —Chë salud tmotsobomñënga, ashnayá ndoñe ntsëjabótana, pero chë šoquëngna aíñe. Y atše ndoñe chiyátabo chë Bëngbe Bëtsabe bominÿiñe tšabá amënga jabáchembuama, ndayá chë bacna soye amënga imomna ca juabnayënga átsbioye jabáchembuama ca.

*Jesús tmojantjá chë Bëngbe Bëtsáftaca jencuéntama
tondaye saytescama
(Mt 9.14-17; Lc 5.33-39)*

18 Canÿe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básefta entšanga Jesúsbioye tmojanobeconá y mëntšá tmojanianyana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjédayënga ndoñe chca ca?

19 As Jesús tojanëjua: —Chë casamento fiestentše, chë ófjanënga saná ndoñe ntsabuáshebenana. ¿Ntšamo chca ndoñe nántsemna? Chë tojobouamá entšá chëngaftaca tojtsemnëntscuana, chë ófjanënga bëtscá jasana y cháftaca oyejuayënga jtsemnana. 20 Pero ora echanjobuache y chë boyabása chëngbentsana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë tojobouamá boyabása y chë ofjanëngaftaca endmëncá, cachcá endmëna atše y atšbe uatsjédayëngaftacnaca.

21 “Ndocná, canÿe tanguá entšayá, base tsëm entšëjuaca jtarmëndana; chca tcojamëse, chë tsëm entšëjua jtsabéconana y chë tanguá entšayá más jtsatanëcanana, y chca, chë uátanëcniñe más bëtsiñe jtsabemana. 22 Y cach ndoñe, chë tojtseshayana vínoye tanguá jasabenguiñe ntjataftsuámayana; er chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; chca, chë jasabenga y chë vínoye

josérviana ca” —Jesús tojánayana.

Jesusbe uatsjéndayënga canÿe ochnayté trigo tmojanátabebe

(Mt 12.1-8; Lc 6.1-5)

²³ Canÿe ochnayté, Jesús canÿe jajajana yojtsaye; y chabe uatsjéndayënga chëjana imojtsachñëjuana ora, tmojanontsé trigo juatabebiana. ²⁴ Chë farise-unga chca imojinÿe ora, Jesúsbioye tmojanियana: — Minÿe. ¿Ntsámo acbe uatsjéndayënga montsamcá, ndoñe quenátslesenciana ochnayté jtsamama ca?

²⁵ Pero cha tojanëjua: —¿Ndoñe šmëndualía y šmondétatšëmbo ntsámo Rey David y chabe enutënga tmojanmama shëntseca imojtsemna ora y jasama yojtsëjaboto ora? ²⁶ Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashëngo, y chë luarentše Bëngbe Bëtsá yojamnama inÿinÿnaye tandëšënga yojase; y chë cháftaca imojánajna entšángnaca yojátšataye. Y chë tandëšna nÿe bachnangbiama belesenciana jasama. Masque David chca tojanma, Bëngbe Bëtsá ndoñe tonjánayana David canÿe bacna soye tojanma ca.

²⁷ Y Jesús más tojánayana: —Bëngbe Bëtsá ochnayté entšabiama tojama y entšá ndoñe tbonjánbema nÿe chë ochnayté ndoñe chaondëtrabajama. ²⁸ Chíyeca, Bëngbe Bëtsá Entšá tbojanbemá, ndayá entšá ochnayté tojtsama sóynaca jtsemándayana ca.

3

Chë buashana cucuatše bomna entšá (Mt 12.9-14; Lc 6.6-11)

¹ Chentshana, Jesús cachiñe chë judiëngbe enefjuana yebnoye tojésanamashëngo; y chentše canye boyabása yojtsemna, buashana cucuatše bomná.

² Chë fariseunga chiñe imojtserrondana jinýama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana. ³ Chora Jesús chë buashana cucuatše bomnábioye tbojaniyana: — Chentše, entšangbe delante motsa ca.

⁴ Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochócama ca?

Pero chënga ndocá tmonjanjuá, nýe iytëca imojobiama. ⁵ Chora Jesús rábiaca y ngménaca chë fariseunga tojanënyanyé, chënga ainaniñe josértama ndoñe montseboše causa; y chë buashana cucuatše bomnábioye tbojaniyana: —Macuenyanëjaná ca.

As chë boyabása tojanacuenyanëjaná, y chora tšabá chëtša yojtsatamna cach inýetšacá. ⁶ Pero chë fariseungna, chentshana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontsé juabnayana ntšamo jamëse Jesús jóbama.

Mallajta entšanga Jesúsbioye tmojanobeconá

⁷ Chentshana, Jesús chabe uatsjëndayëngaftaca tojanoluaré mar bėjaye tsachoye, y Galileocana bëtscá entšanga tmojanasto. ⁸ Inýe entšángnaca chábioye tmojanobeconá Judeocana,

Jerusalenocana, Idumea ca uabaina luarocana, Jordán bėjaye chengvanoicana, Tiro y Sidón puebləngocana. Chənga tmojanobeconá, Jesús tša bəts soyənga yojsamama tmojanuena ora. ⁹ Jesús chabe uatsjəndayənga tojanəyana: “Motsajna y canyə barquəsha atšbiamá šmochjuapróna, tša entsanga ndoñe chašmondətsatsəntšnama ca.” ¹⁰ Er cha banga tojanashná, y chə causa, nյetscanga šocana bomnənga chábioye tmojanojuatsəntšená cha jabojuama.

¹¹ Y chə bacna bayəjənga uambayəngna, Jesús tmojinյe ora, betsko chabe shecuatsəntše imojtsofshəntsaməntšenaye, y chə bacna bayəjəngbeyeca məntšá imojtsáyebuache: “¡Aca Bəngbe Bətsabe Uaquiñá condməna ca!”

¹² Pero Jesús puerte tojanaməndá, nda cha bətsemnama entsangbe delante ndoñe chamondətsichámuama.

Jesús chə bnətsana uta uatsjəndayənga tojanabacacá

(Mt 10.1-4; Lc 6.12-16)

¹³ Chentšana, Jesús canyə batsjoye tojántsjua, y ndəmuanյənga tšabá tbojanínյnanənga tojánachembo. Y chəngna chábioye tmojanobeconá.

¹⁴ Chora, chənguentšana bnətsana útata tojanəbuáyana, chamotsetjəmbambnama, y Bəngbe Bətsabe soyəngama entsanga chámabuayenama;

¹⁵ y chənga obenana tojanatsatá entsangbentšana bacna bayəjənga jtəbuacanama. ¹⁶ Mənga mondmeña chə bnətsana uta bocacánənga:

Simón, chə ndábioye Pedro ca Jesús tbojanabaye;

¹⁷ Santiago y chabe uabentsá Juan, Zebedeobe

uaquiñata, chata tojanëbaye “boanerges ca”, y chca endayana “uajuesayabe uaquiñata ca”;¹⁸ Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá;¹⁹ y Judas Iscariote, chë chentšana ndoñe baytesna, Jesús uayayëngbe cucuatšine bochjanboshjoná.

Ley abuátambayënga tmojánayana, Jesús Satanásbentšana obenana tojanóyëngacñe ca
(Mt 12.22-32; Lc 11.14-23; 12.10)

²⁰ Chentšana, Jesús yebnoye tojtanamáshëngo, y tša entšanga chentše tmojanójoto; chë causa, ni cha ni chabe uatsjëndayënga, ni mo jasama luare ndoñe imontsebmna.²¹ Jesusbe pamíllanga ntšamo cha yojtsepásama tmojántatsëmbona ora, tmojána cha jetsbetšama, er entšanga imojtsencuëntaye cha opá tojtsanóbema ca.

²² Y chë ley abuátambayënga Jerusalenocana tmojánashjajnëngna Jesusbiana mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbioye obenana tbojatšetá entšángbentšana bacna bayëjënga chauatëbuacnama ca.”

²³ Chënga chca imojtsichámuama, Jesús chënga tojánachembo, y cuentëngaca tojanontsé jáuyanana, jinñanñiyama chënga canye ndoñe ndegombre soyiñe imojtsemnama, mëntšá: “¿Ntšamo Satanás nantsobena cachá jtenábocnama ca?”
²⁴ Canye amëndayábentše entšanga tmojtsenojatá y tmojtsenáyase, chë amëndayana ndoñe ntjatotonana.²⁵ Cachcá, canye yebnentše

pamíllanga tmojtsenojatá y tmojtsenáyase, chë pamíllanga ndoñe tšabá nyets tempo quemochátsmëna. ²⁶ Y cachcá, Satanás y chábenga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá quemochátsmëna.

²⁷ “Ndocná quenátobena canÿe corente añemo bomna entšabe yebnoye jamashënguana y chabe soyënga jtsebocana, ndoñe natsana tconjshétsebatsëquëse. Nÿe tcojshétsebatsëquëse cocayé cuanjobenaye cha jefcana.

²⁸ “Ndegombre cbëyana, Bëngbe Bëtsá entšangbe nyetsca bacna soyënga echanjáperdonaye, y ntšamo Bëngbe Bëtsabiana y ínÿengbiana ndoñe tšabá tmontsichamo soyëngnaca; ²⁹ pero chë Uámana Espíritbiana ndoñe tšabá ichámëngna ndocna te queochátaperdonaye, er nyetsca tescama castigánënga jtsemnama chënga jtsamnana ca” —Jesús tojánayana.

³⁰ Jesús chca tojanëyana, er chënga imojtsichamo cha bacna bayëja ibojtsambá ca.

*Chë Jesusbe ndegombre pamíllanguentsënga
(Mt 12.46-50; Lc 8.19-21)*

³¹ Chëntscuana, Jesusbe mamá y catšátanga choye tmojánashjajna, pero nÿe shjoca imojtsemna; y canÿa tmojanichmó cha jachembuama. ³² Chë ba entšanga chentše chabe shëconana imojtsetbiámanëngna, chora tmojanianyana: —Acbe mamá, acbe catšátanga y uabëngana shjoca montsemna; aca cmontsenguá ca.

³³ Chora cha tojanējua: —¿Nda atšbe mamá yomna, y ndēmuanŷenga atšbe catšátanga ca?

³⁴ Chentsana, chë chabe shëconanana tbiamanéngbioye jarrepárase, tojánayana: — Quemënga mondmëna atšbe mamá y atšbe catšátanga. ³⁵ Er ndánaca, ntšamo Bëngbe Bëtsá yobošcá tojtsamá, jtsemnana atšbe catšata, atšbe uabena y atšbe mamá, atšbe ndegombre pamillanguentsá ca.

4

Chë jenabe cuento

(Mt 13.1-9; Lc 8.4-8)

¹ Chentsana, uafjajónaye tsachoca Jesús tojtëtanontsé Bëngbe Bëtsabe soyëngama jabuátambama. Mallajta entsanga tmojanobeconá causa, chë uafjajónayentše yojanamna canŷe barquëshoye Jesús tojánášëngo y tojanótbema; y chë entsanga tsachoca imojtsemna. ² Chora cuentëngaca ba soyëngama tojanabuatambá.

Mëntšá tojanëyana: ³ “Smochjouena; canŷe jená chë jénaye jaujquëshama yojëftsebocna. ⁴ Yojtsëjquëshaye orna, básefta jénaye benache juachañe yojuatquécjana; pero jaja shloftšënga imojástjajna y lempe imojtsósañe. ⁵ Inŷe meshëngna ndëtsbenguñe yojuatquécjana, ndoñe yapa fshantse binŷnentše. Chiñna betscó yojuábocna, ndoñe yapa jashenocana fshantse yojanmëna causa; ⁶ pero yojuábocna orna, puerte yojojënyána y yojtsancta; y yojtsábojo yapa tbëtëjënga tondaye causa. ⁷ Inŷe meshëngna uchmëshangañe yojuatquécjana; chë uchmashá yojuájua ora,

lempe yojsatscué, y chca, chë jénayentsana tondaye yonjuashájona. ⁸ Pero inye meshëngna, uanguaniñe yojuatquécjana, y bëtsca tšabe shajuanënga chiñe yojóbocna: ínÿenache, canÿe meshentsana unga bnëtsana meshënga yojóbocna; ínÿenachna, chnënguana bnëtsana meshënga; y ínÿenachna patse meshënga ca” –cha tojánayana.

⁹ Y chentsana, Jesús más tojánayana: “Chë jouenama tmojtsobenënga, šmochjouena ca.”

*Ndáyeca Jesús cuentëngaca yojánabuatambaye
(Mt 13.10-17; Lc 8.9-10)*

¹⁰ Chentsana, Jesús canÿa yojoquéda ora, chë chabe béconana imojtsemnënga chabe bnëtsana uta uatsjéndayëngaftaca, tmojantjá ndayá chë cuento bétsayanama. ¹¹ As Jesús tojanëjua: “Bëngbe Bëtsá tšëngaftanga cmontsinÿanÿná nÿetsca chë mo iytëmcá yomna soyënga chabe amëndayama, pero chë ínÿëngbioye ndoñe; chë soyëngama chënga lempe cuentëngaca sëntsëtsëtsná. ¹² Chca, masque becá chamotsafšna, ndoñe chamondobená chë Bëngbe Bëtsabe soyënga jinÿama; y masque becá chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

*Jesús chë jenabe cuentama tojanabuayená
(Mt 13.18-23; Lc 8.11-15)*

¹³ Chentsana, Jesús tojanëyana: “¿Quem cuentama ndoñe tcmonjósertase, ntšamo chc case nÿetsca cuentëngama cmochjóserta ca? ¹⁴ Chë jená endmëna chë tšabe noticiëngama abuayinayá. ¹⁵ Básefta entšanga mondmëna

mo chë benache juachañe yojuatquécjana jenaycá. Chëngna Bëngbe Bëtsabiana soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabétsabuajuanama, chënga chiñe ndoñe chamondëtsošbuáchema. ¹⁶ Inyë entsanga mondmëna mo chë ndëtšbenguñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana; ¹⁷ pero ndoñe nyëts tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inyënga mochantsëbuayënja, y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonjaye. ¹⁸ Inyënga mondmëna mo chë uchmëshangañe yojuatquécjana jenaycá. Chënga Bëngbe Bëtsabe palabra mochanjouena, ¹⁹ pero quem luarentša soyëngaca oyejuayënga jtsemnana yapa mochántseboše, y nyë bomnana jëftsebomnana yapa mochanjésenojuabnaye. Chë soyama y inyë ba soyëngama yapa enócochinyëna causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá. ²⁰ Pero inyënga mondmëna mo chë uanguanñe yojuatquécjana jenaycá. Chëngna Bëngbe Bëtsabe palabra botamana mochanjouena; nyëts ainánaca mochántseprontana chiñe jtsošbuáchiyama. Mo canyë betiye becá tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Inyënga ín्यëngbiana más

bëtská soyënga mochanjama; y chca, ínÿenga mochántsemna mo chë unga bnëtsana meshe tojanshajo jenaycá, ínÿenga mo chë chnënguana bnëtsancá, y ínÿengna mo chë patse meshënga tojanboté jenaycá ca” —Jesús tojánayana.

Chë uajuinÿanëshama cuento
(Lc 8.16-18)

²¹ Mëntsánaca Jesús tojánayana: “Ndocná juiyëbana canÿe uajuinÿanëshu cajonëshu o jut-snëshu tajsoye juajájuama. Ndoñe; uajuinÿanëshu juiyëbana tsbanánoca juajájuama, lempe chaotsebínÿnama. ²² Ndocna yoiytëmena soye ntjinÿencá queochaisoquéda, y chë ndótatsëmbo soye ntsotatsëmbcá queochaisoquéda. ²³ Chë jounama tmojtsobenënga, šmochjouena ca.”

²⁴ Y mëntsánaca Jesús tojanëyana: “Tšabá šmochjájua boye ntšamo šmojtsuenanama. Nÿe batšatema šmojouenëse, nÿe batšatema cmochanjósertaye; pero aíñe tšabá šmojouenëse, chama corente cmochanjósertaye; y Bëngbe Bëtsá echanjama tšëngaftanga más soyëngama chacmósertama. ²⁵ Er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nÿe batšá ibosertana soyëngama bochántsebnatjëmba ca” —cha tojánayana.

Chë ojuajna jenayama cuento

²⁶ Jesús mëntsánaca tojanëyana: “Bëngbe Bëtsabe amëndayana endmëna mo ntšamo canÿe boy-abása jénaye tojuatbontsá ora echandbopasacá:

²⁷ masque cha cada ibeta jtsojájuana y bnëté jotsbanama, ibeta o bnëté, chë jénayentsana juabocnana y juájuana, ntšamo chca yojtsájuajnama chë boyabása ntjatstatšëmbcá. ²⁸ Chë fshantse cachabe ponto jamana ndayánaca chiñe chaójuama; natšana tsbuanachëtema jóbocnana, chentšana chë es-piga, y chentšana chë meshënga jashájonana. ²⁹ Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

Chë mostaztiye jenayama cuento

(Mt 13.31-32; Lc 13.18-19)

³⁰ Jesús mëntsánaca tojanëyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama? ³¹ Endmëna mo canyë mostaza jénaye jajoca tcojajecá. Ndegombre, nyetsca quem luarentša jenayëngama, mostaza jénaye chë más básetema endmëna; ³² pero tcojajé orna, jójuana, y jajañe chë más bëts betiye jóbemana, ba bëts buacuashëngaca; chíyeca chë jaja shloftšënga jana y chiñe uajajonëtemëngá jauábopormana ca.”

Ndáyeca Jesús cuentëngaca entsanga yojanabuayiyná

(Mt 13.34-35)

³³ Chca Jesús Bëngbe Bëtsabe soyëngama entsanga yojanabuatambá, ba cuentënguentšana, mo chë tmonjouena cuentcá, ntsachetšá chë entsanga josértama tmojobenacá. ³⁴ Tondaye yonjanabuatambá ndoñe cuentëngaca ntsemëncá; pero chabe uatsjëndayëngna lempe yojanabuayiyná, cányënga tmojtsemna ora.

*Jesús chë binÿia y chë béjaye bonguana
yojëtsbema*

(Mt 8.23-27; Lc 8.22-25)

³⁵ Cach te, yojtseibétatana ora, Jesús chabe uatsjéndayënga tojanéyana: “Uafjajónaye chenguana cuajna ca.”

³⁶ Chorna, chë entšanga jesabáshejuanëse, chë uatsjéndayënga Jesús tmojtsanánatseñe, cach yojánenjaquena barquëshañe; y inÿe entšángnaca inÿe barquëshangañe tmojanasto.

³⁷ Chentšana, chë uafjajónaye béjayiñe tša jabuache binÿia yojóshjango; olëshënga chë barquësha imojtsëtsbotsana, y chë causa chë barquësha yojóntša búyesheca jtsobuajútjiana.

³⁸ Y chëntscuana, barquësha stëtsoica, tsëntšenëshañe Jesús yojtsomañe. Chora chë uatsjéndayënga tmojtsanfšená y tmojaniyana: — ¡Buatëmbayá! ¿Tondayana cmontsentšamna bënga chašotsënatjëmbama ca?

³⁹ As Jesús tojantsbaná, chë binÿia tbojanácacana, y chë bëts uafjajónayoye tojánayana: — ¡Natjëmbana cochtsemna! ¡Bonguana ca!

Y cachora chë binÿia yojëtstëcja, y lempe bonguana yojtsatsmëna. ⁴⁰ Chora chabe uatsjéndayënga tojanéyana: — ¿Ndáyeca tša šmojtsauatja? ¿Bëngbe Bëtsá tšëngaftanga jujabuáchama yobenama cabá ndoñe šmontsošbuaché ca?

⁴¹ Chama, chënga puerte auatjanánënga imojtsemna y mëntšá imojtsenatsëtsnaye: “¿Nda quem boyabása yomna? Cha tonjayana y chë binÿia y chë béjaye tmonjoyeuná ca.”

5

Chë Gerasa luaroca bacna bayëja uambayá
(Mt 8.28-34; Lc 8.26-39)

¹ Chentsana, uafjónaye chenguánoica tmojánashjajna, Geraseno ca uabaina entšangbe luaroye. ² Jesús barquëshoicana tojánastjango, y cachora, chë obanëngbe cuevëshënguentšana canÿe entsá, bacna bayëjbe juabna uambayá, tojánbocna y tbojanjébengo. ³ Chë boyabásana, obanëngbe cuevëshënguenache inoyena, y ndocná yonjobena cha jtsebátsëcana, ni mo cadenëjuangaca; ⁴ er ba soye cadenëjuangaca y inÿe soyëngaca cha nÿetsá tmojanbatsëca, pero cha nÿetsca soye yojtsátabebe y yojtsenájaca, y ndocná yonjobenaye cha bonguana chaotsemnama. ⁵ Nÿets tempo, bnëtë y ibeta, obanëngbe cuevëshënguenache y tjañenache yojánana yoye, y ndëtšbéngaca enotsetšenaye. ⁶ Jesúsbioye bënocana tbojáninÿe ora, chábioye tojanótjajo y chabe natsanoica yojoshëntsamentsiye; ⁷ y mëntšá yojtsáyebuache: —¿Ndayá átšeftaca cojtseboše, Jesús, celoca Bëngbe Bëtsabe Uaquiñá? ¡Bëngbe Bëtsabe delante cboimpadá, ndoñe šcatjatsetšená ca!

⁸ Chca tbojaniyana, er Jesús chábioye tbojaniyana: —¡Bacna bayëjbe juabna, chábentsana maisebocna ca!

⁹ Chentsana Jesús tbojantjá: —¿Ntšamo cabaina ca?

Y chë bacna bayëjengbe juábnaca cha tbojanjuá: —Atšna Legión ca sënduabaina, bëtscanga fsëndmëna causa ca.

10 Y tša Jesús ibojtserruana chë luarentšana ndoñe chaondëtëbuacanama. 11 Chentša béconana ba cotšënga imnajena, batsjoca imnétsošañe; 12 as chë bacna bayëjënga Jesúsbioye tmojanimpadá: — Chë cotšëngbioye šmichamó, chëngbeñe fchayamashjna ca.

13 Y Jesús aïñe tojanalesenciá; as chë bacna bayëjënga chë entšábentsana tmojésanbocana y chë cotšëngbeñe tmojánamashjna. Cachora chë mo uta uaranga cotšënga batsjocana peñësëjana uafajónayoye imojtsoshbuetše y yojtsatajo.

14 Chora, chë cotšënga anÿenënga tmojtsanacheta auatjanánënga, y tmojána chama jacuéntama chë puebloca y chabuenache; y entšanga tmojánabo ntšamo tojanopasacá jinÿama. 15 Jesús yojtsemnoye chë entšanga tmojánashjajna ora, tmojáninÿe chë tempo bacna bayëjënga uambayá, inétsotbemañe, entšayá uichëtjoná y chabe nÿets juábnaca. Y chë entšanga chama imojtsëuatjaná. 16 Chë tmojáninÿënga imojtsecuéntaye, ntšamo chë bayëjbe juabna uambayáftaca tojanopasama, y chë cotšëngaftaca ntšamo tojanopasámnaca. 17 Chora chë entšanga tmojanontšé Jesús impadánana chë luarentšana chaotsatoñama.

18 Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesenciá cháftaca jama ca. 19 Pero ndoñe tbonjanlesenciá, sinó mëntšá tbojaniyana: “Acbe yebnoye motsatoñe, acbe pamíllangbioye, y cochjácuntaye ndayá Bëngbe Utabná ácaftaca tojamama, y ntšamo cha ácbioye tcmojalastemama ca.”

²⁰ Chentšana, chë entšá yojtsatoñe y tojanontšé Decápolis uabaina pueblënguenache jacúntana lempe ntšamo Jesús cháftaca tojanmcá; y nÿetscanga imojtsenjnanaye.

Jesús canÿe shembásabioye tbojanshná y Jairëbe bembetémbioye tbojtanayená
(Mt 9.18-26; Lc 8.40-56)

²¹ Chentšana, Jesús cachiñe chë uafjajónaye chenguana tojesaná barquëshañe. Chocna ba entšanga tmojanobuashconá, y Jesús chë uafjajónaye tsachañe yojtsemna. ²² Chorna, tojánashjango chë judiëngbe enefjuana yebnentša canÿe mandayá, Jairo ca uabainá. Jesúsbioye tbojáninÿe ora, chábertše tojanoshëntsamentšé, ²³ y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjajáua, salud chauatinÿenama y cháuatayenama ca.

²⁴ As Jesús cháftaca tojána; pero bëtscá entšanga imojtséstona, chábioye imojtsenatsëntšenaye. ²⁵ Chë entšanguentše yojtsaye canÿe shembása šocá; cha ya bnëtsana uta uata oboftjajuanánaca inapadecena. ²⁶ Cha puerte tojansufrí, ba ashnayëngbe cucuatšinë, y lempe ntsachetšá inabomncá tojanpochocá jenóshnama; pero ndoñe ibontsatšécacjana, nÿe más peor ibojtsobiamnaye. ²⁷ Chë shembása vojouena ntšamo Jesús ba šoquënga tojánashnama, y as stëtšoicana entšangbe tsëntsajana yojobeconá, y Jesusbe entšayá yojauábojajo. ²⁸ Cha chca tojanma, er yojtsejuabnaye: “Masque nÿe mo chabe entšayá sibiájua chajjuábojajo, y

salud chantsatsbomna ca.” ²⁹ Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojtsatsmënana.

³⁰ Chora Jesús yojaséntia chábentšana obenana yojóboचना, mo ndábioye tbojashná orcá; as cha tojanobuértana entšángbeñe y tojanatjá: —¿Nda atšbe entšayá tojuabojajo ca?

³¹ Chabe uatsjéndayënga tmojanjuá: —Aca con-tsonyá chë entšanga cmontsatsëntšená, y cabá cochjátsnoticiaye nda entšayá tojuabojajo ca.

³² Pero Jesús cátoye yojtserreparana jinýama nda tbojánbojajuama. ³³ As chë shembása, chë ntšamo cháftaca yojopásama jtsetatšëmbëse, tojanobeconá ngmëmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojanianyana. ³⁴ Chora Jesús tbojanianyana: —

Bembe, Bëngbe Bëtsábeñe icošbuachéyeca shnaná contsatsmëna. Natjëmbana motsatoñe; acbe šocana tontsopochocá ca.

³⁵ Jesús cabá yojtsóyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojanianyana: —Acbe bembe tontsóbana; ¿ndayama más Buatëmbayá chama cochjátebëyaboma ca?

³⁶ Y Jesús, ntšamo chënga imojtsichamcá nt-jatuenancá chë judiëngbe enefjuana yebnentša mandayábioye tbojanianyana: —Ndoñe matauat-jana. Nýe Bëngbe Bëtsábeñe cochtsošbuáchiye cha tšabá chaotsatsmënana ca.

³⁷ Y Jesús ndoñe tonjanalesenciá Jairëbe yebnoye banga chamuastama; nýe Pedro,

Santiago y Juan, Santiagbe uabentsana, aíñe. ³⁸ Chentsana, chë mandayabe yebnoye tmojánashjajna ora, Jesús tojánanýe entsanga tša imojtsenbouenana, entsanga imojtsošachiye y puerte ngménaca imojtseyoye. ³⁹ As chë yebnoye tojánamashëngo y chë entsanga tojanéyana: “¿Ndayama tša šmojtsenbouenana y tša šmojtsendëntjana? Chë shembásetema ndoñe chenatóbana, nýe endëtsomañe ca.”

⁴⁰ Pero entsanga nýe imojtsáfchaye. As Jesús nýetsca entsanga shjoye tojtanëbuacna, y tojëftsanëbiatše chë basetembe bëtsétsata y chabe enutënga; y chë shembásetema yojtsemnoye tojánamashëngo. ⁴¹ Chora Jesús tbojanábuacueshache y cachëngbe biyañe tbojanianyana: “Talita, cum ca.” (Chca endayana “Shembásetema, matëtsbaná ca”.)

⁴² Cachora, chë bnëtsana uta uata bomna shembásetema tojtantsbaná y yojtsobena jama. Y chë entsanga chama imojtsenjanaye. ⁴³ Pero Jesús corente tojanamëndá ndocnábeñe chama ntsecuéntayana ca, y tojanamëndá chë básetema saná chamuiyé chaosama.

6

Jesús Nazaret puebloca (Mt 13.53-58; Lc 4.16-30)

¹ Chentsana Jesús tojëftsanbocna y cachabe luaroye tojtanashjango, y chabe uatsjëndayënga cháftaca tmojána. ² Ochnayté tojanobuache ora, Jesús tojanontsé chë judiëngbe enefjuana yebnentše entsanga jabuátambana.

Chë ba entsanga cha jóyebuambayama tmojanuenënga, imojenjnaná y tmojánayana: “¿Ndémoca quem boyabása lempe chca tojuatsjinÿe? ¿Ndaye osertánana mua tmojatsetá, y ntšámoyeca cha yojtsobena chca bëts soyënga jtsamana ca? ³ ¿Mua ndoñe chë calpintero yondmëna, Mariybe uaquiñá, y chabe catšátanga ndoñe mondmëna Santiago, José, Judas y Simón; y chabe uabéngnaca muentše ndoñe bëngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboše joyeunayana. ⁴ As Jesús tojanéyana: “Nÿetsca luarënguenache canÿe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentše, ni cachabe pamíllangbenache, ni cachabe yebnentše ca.”

⁵ Chë entsanga chentše chábeñe ndoñe montsanošbuaché causa, Jesús ndoñe tonjanobená ni canÿe bëts soye Bëngbe Bëtsabe obenánaca chentše jëftsemana; nÿe básefta šoquëngbeñe cucuatšënga tojanajajó y tojanashná. ⁶ Jesús ojnananá yojtsemna cachábentša entsanga chábeñe ndoñe montsanošbuaché causa.

*Jesús, chabe uatsjëndayënga tojanichamó Bëngbe Bëtsabe amëndayama jábuayenama
(Mt 10.5-15; Lc 9.1-6)*

Chentšana, chë chaboye base pueblënguenache Jesús yojánana, Bëngbe Bëtsabe soyëngama abuatambaye. ⁷ Y chë bnëtsana uta uatsjëndayënga Jesús tojánachembo, y utáta ínÿoye tojanichamó, entsángbentšana bacna bayëjënga jtëbuacnama obenana jatšatayëse; ⁸ y mëntšá yojáuyana:

“Benachiñama tondaye šmattsambaye, nÿe canÿe jatjonëfja; ndoñe šmattsambaye saná, ni shecnaja, ni crocénana uasnanëchiñe. ⁹ Nduámanëshe šmochjesóshecochëtjo, y nÿe canÿájua šmochjesíchëtjo ca.”

¹⁰ Mëntsánaca tojanëyana: “Posada chacmojúyentšame yebnentše šmochtsoquedañe inÿe puebloye játantscuana. ¹¹ Canÿe luaroye chašmojáshjajna y ndocná posada chacmonjuyentšame, y joyeunayama ndoñe chamontsebošëse, chentšana šmochjésebecana, y shecuatšentša polvëshe šmochjésenstoto, chca, chëngbioye jinÿanÿiyama chënga ndoñe tšabá tšëngaftangaftaca tmonjamama ca.”

¹² Chentšana, chë uatsjëndayënga tmojëftsanbocana y entšanga imojánabuayiyayae, chë tšabe benache chámuatishachama, bacna soyënga amana jtsajbanase. ¹³ Entšángbentšana ba bacna bayëjënga tmojtanëbuacna, y ba šoquënga aceitíyeca tmojananëtotjo y tmojanashná.

*Ntšamo Juan chë Ubayaná tojanóbana
(Mt 14.1-12; Lc 9.7-9)*

¹⁴ Rey Herodes Jesusbiana yojátatsëmbona, er nÿetsquénache nÿetsca entšanga chabiana imojtsóyebuambnaye. Entšanga Jesusbiana imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

¹⁵ Inÿengna imojtsichamo: “Cha entsemna chë Bëngbe Bëtsabe juabna oyebuambnayá Elías ca.”

Y inÿengna: “Muana canÿa Bëngbe Bëtsabe juabna oyebuambnayá, mo chë tempsquëngcá ca.”

16 Heródesna ntšamo entšanga Jesusbiam a imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentšana tojtayena ca.”

17 Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiam a. Herodes chca tojanma Herodíasbe causa, chabe uabentsá Felipe shema. Herodes chë shémaftaca tojanoubouamá, Felipe cabá ainá ora. 18 Y chama, Heródesbioye Juan ibojánbuayiynaye: “Ndoñe quenátslesenciana acbe uabentsabe shema acbe shema chaotsemnama ca.”

19 Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena, 20 er Herodes yojántatšëmbo, Juan canye nyetsca soyënguiñe tšabá amá, nye Bëngbe Bëtsábioye sempre oservená inamnama. Chama cha yojánauatja y ndoñe yonjanaleséncia cha chamóbama. Y Juan Bëngbe Bëtsabe soyëngama Heródesbioye tbojtsebuayiyná ora, ntšamo jajuaboyana ndoñe yontsetátšëmbo, pero masque chca, oyejuayá Juánbioye ibnayeunana. 21 Pero Herodías tojáninýena mocna ora Juan chamóbama. Heródesbe cumpleño oboyejuaye ora, bëtscá saná tmojanprontá, y Herodes yojúbuaja chabe amëndayënga, soldadëngbe amëndayënga y Galileoca uámana entšanga. 22 Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nyetsca ófjanënga chama tša imojtsóyejuaye. As chë rey, chë tobiášbioye tbojaniyana: —Ndayánaca

šmotjañe y atše cbochjátšetaye ca.

²³ Y jajúrase, mēntsá tbojanšbuachená: —Ntšamo chašcojotjañcá cbochjátšetaye, masque atšbe amēndayentša bomnantšana tsěntsañnaca ca.

²⁴ Chentšana, chē tobiāše yojěftsebocna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chē Ubayanabe bestšaše ca.

²⁵ Cachora chē tobiāše betscó chē rey yojtsemnoye tojtanamáshēngo, y tbojaniyana: —Atše sěntseboše, cam ora Juan chē Ubayanabe bestšaše canye šcneněšiñe chašcuatšetá ca.

²⁶ Herodes chama corente tbojanongmé, pero chē entšangbe delante y jajúrase tbojanšbuachená causa, ndoñe yonjobenaye ntšamo tbojaniancá jebēbuetámenana.

²⁷ Cachora chē rey canye soldado ibojíchmua, Juanbe bestšaše chauiyēbama.

²⁸ As chē soldado cárceloye tojána, Juánbioye bestšaše tbojtsaněstjango, y canye šcneněšiñe tojanamba. Chē tobiášbioye tbojaněntšabuaché, y chana, chabe mamábioye.

²⁹ Juanbe ústonēnga chama imojátatšēmbona ora, choye tmojánashjajna, chabe cuerpo tmojésanocñe y jauábtontsama tmojána.

Jesús shachna uaranga boyabásenga saná tojanacaredadó

(Mt 14.13-21; Lc 9.10-17; Jn 6.1-14)

³⁰ Chē Jesús tojánichamonga chábioye tmojtashjajna ora, lempe ntšamo tmojanmama y tmojanabuatambama cha tmojancuentá.

³¹ Chora Jesús tojanéyana: “Cuajna ínŷoye, entšanga ndoyena luaroye, batšatema jóchnama

ca.” Cha chca tojánayana, er tša entšanga imojtsaye y imojtsabëbana; ni mo jasama ndoñe luare imontsebmna.

³² As cányenga barquëshañe tmojtsanoñe, entšanga ndëbínÿnoye. ³³ Pero chënga imojtsoñama entšanga tmojánanÿe, y ndëmuanÿenga imojamnama imojtsetátšëmbo; chcasna, chë entšanga shecuátšeca betscó tmojána, nÿetsca pueblënguentšana, y chëngbe natsana choye tmojánashjajna. ³⁴ Chentsana, chë barquëshoicana tojánastjango ora, Jesús ba entšanga tojánanÿe; chëngbiana tbojanongmé, er imojtsemna mo abuaÿñÿa ndbmna oveshëngcá; y tojanontsé ba soyëngama jabuátambana.

³⁵ Ya jetiñe yojtsemna orna, chabe uatsjëndayënga tmojanobobeconá y tmojanियana: —Ya jetiñe entsemna, y quem luariñe ndocná quenatiyena. ³⁶ Entšanga cuantichamuá, pueblotémëngoye y inÿe luarëngoye chamotsoñama, ndayánaca jasama chamobuámiñama ca.

³⁷ Y Jesús tojanëyana: —Tšëngaftanga saná chëngbioye šmochjacaredádaye ca.

Chora chënga tmojanियana: —Crocénana queftsátšbmna, uta patse denario nÿetšá, chëfta entšangbiana saná jabuámiyama ca.

³⁸ As Jesús tojanëyana: —¿Bueta tandëse šmojtsebmna? Marrepáranga ca.

Ya imojtsetátšëmbo ora, tmojanियana: —Shachna tandëse y uta beónata fsëntsebmna ca.

³⁹ Chora Jesús entšanga tojanamëndá ínÿoca ínÿoca chamoshëntsjatbiamama. ⁴⁰ As

chënga tmojanotbiama patse patsënga y shachna bnëtsátsanënga. ⁴¹ Chora Jesús chë shachna tandëse y chë uta beónata tojanca, y celoye jontješiyëse, Bëngbe Bëtsábioye chama tbojtanchuá. Chentsana chë tandëšënga tojanjatá y chabe uatsjëndayënga tojanayentsbuaché chë entsanga jatsatayama. Y chë uta beónatnaca nyëtscanga tojanëjátaye. ⁴² Nyëtscanga tmojanse jtoshachaye nyëtšá. ⁴³ Y chentsana, chë tandëse y chë beonentšana ojamnëtemënga tmojanatbaná, y bnëtsana uta sbarëcua tmojanajutjé. ⁴⁴ Chë saná tmojansënga imojamna shachna uaranga boyabásenga, shembásenga y básenga ntjacuntacá.

*Jesús bėjaye juatsbuacá yojtsaye
(Mt 14.22-27; Jn 6.16-21)*

⁴⁵ Chentsana, Jesús chabe uatsjëndayënga tojanamëndá chë barquëshoye jtašjnama, chë uafjajónaye chenguana jangana y chabe natsana Bet-saida ca uabaina puebloca jashjajnana. Chënga imojtsebocanëntscuana, Jesús chë entsanga yojtichamuá. ⁴⁶ Nyëtscanga tojtanadiošoftá ora, tjoye cha tojtsanoñe Bëngbe Bëtsáftaca jencuëntama.

⁴⁷ Yojtseibétatana ora, chë barquëshu uafjajónaye tsëntsaca yojtsamna, y Jesús, canya fshantsoca. ⁴⁸ Jesús tojáninye chëngbiamá totcá yojtsemna, chë barquëshaca natsanoye jtsayana, er binýia chëngbe contra yojtsemna. Ya binýana ora, chëngbioye yojobeconá, bėjaye juatsbuacá yojtsaye, y ya chëngbiajana nye ndericho jachnënguama yojtsemna. ⁴⁹ Y chënga, chë bėjaye juatsbuacá cha yojtsayama tmojáninye ora, tmojanjuabó cha canye añemëse yojtsemna

ca, y tmojanontsé yoyana; ⁵⁰ er nyetscanga chca tmojáninýe y cochauatjanánenga imojtsemna. Pero Jesús cachora tojanéyana: “¡Añemo smochtsebmna; atše Jesús sēndmēna; ndoñe matauatjēngana ca!”

⁵¹ Chorna, chēnga imojtsemna barquëshoye cha tojánasēngo, y chē jabuache binýia tojanéjbana, y nyetscanga puerte auatjanánenga y ojnánenga imojtsemna. ⁵² Chēnga tmojáninýe chēfta entsānga tandēse jujátayana, pero chēngbe ainanoca cabá ndoñe imontsobena josértana, Jesús lempe jamama obená bétsemnama.

Genesaret ca uabáinoca Jesús ba šoquēnga tojanashná

(Mt 14.34-36)

⁵³ Chē uafjajónaye tmojánenashbuachengo ora, Genesaret ca uabaina luaroye tmojánashjajna, y chē uafjajónaye tsachoca chē barquëshsha tmojanétsbua. ⁵⁴ Chē barquëshhoicana tmojánastjajna y cachora entsānga Jesús tmojantēmbá. ⁵⁵ Chíyeca, chē luariñe yebnēnguenache betscoco chēnga tmojána, y tmojanontsé chē šoquēnga tjuashēnguiñe juyambana, chē ndēmoye tmojanuena Jesús yojtsemna luaroye. ⁵⁶ Y ndayentše cha tojámashēngüentše, pueblēnguiñe, bēts pueblēnguiñe y base pueblotēmēnguiñnaca, chē šoquēnga benachoye imojtsēbuacana, y Jesús corente imojtseimpadana chē šoquēnga chaualesenciá, nýe mo chabe entsáyá sibujáua juabojajuana. Y nyetscanga tmojuábojajēnga tšabá imojtsatsmēna.

7

Ndáyeca canýe entsá Bëngbe Bëtsabe delante ndoñe tšabia nántsemna (Mt 15.1-20)

¹ Chentsšana, fariseunga Jesúsbioye tmojanobeconá y báseftanga ley abuátambayëgnaca, Jerusalenocana áshjajnënga. ² Chënga tmojáninýe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá. ³ Er chë fariseunga y nýetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëts taitanga imojanamancá. Chënga imojanjuabná, chca jtsamëse Bëngbe Bëtsabe delante tšábenga jtsatsmënana ca. ⁴ Chë sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyëngnaca imojánama, pero nýe chëngbe bëts taitanga chca jamana imojanamánayeca, mo chë béjayeca juabáyana tazëšënga, matbajënga, calderëshënga y jutsnëshangá. ⁵ Chë causa, chë fariseunga y chë ley abuátambayënga Jesús tmojantjá: —¿Ndáyeca acbe uatsjëndayënga ndoñe montsama ntšamo bëngbe bëts taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tšabá jtsatsmënana ca?

⁶ Chora Jesús tojanéyana: —Nýe tšabá chë Bëngbe Bëtsabe juabna oyebuambnayá Isaías tšëngaftangbiana tojánayana, bacna entsanga chë ntšamo ndegombre šmojuabnacá ndinýinýayënga ca, mëntšá enduabemanentše:

Quem entšanga mondbétsichamo Běngbe Bětsá tša tšabia yomna ca; chca nŷe uayášaca, pero chěngbe ainantše ndocna tšabe juabněngaca.

⁷ Pero chěnga nŷe bonamente mondbétsichamo Běngbe Bětsá tša tšabia yomna ca; chěnga nŷe entšangbe manděnga jtsabuátambayana, y Běngbe Bětsabe manděnga ndoñe ca —cha tojánayana.

⁸ Chora Jesús tojaněyana: —Ntšamo Běngbe Bětsá tojanmandacá stětsoye tšěngaftanga šmojtsequedá, nŷe ntšamo entšanga monduamancá jtsamama ca.

⁹ Y měntsánaca tojaněyana: “Tšěngaftanga ntšamo Běngbe Bětsá tojanmandacá stětsoye jtsequédana, nŷe ntšamo tšěngaftangbe anteunga imojanamancá jtsamama. Tšěngaftanga jtsejuabnayana tšabá šmojtsama ca chca šmojtsama ora.

¹⁰ Moisés tonjánayana: ‘Acbe bětsětsata ndoñe stětsoye catjáquedaye’, y ‘nda chabe bětsětsatbiama ndoñe tšabá tonjoyebuambá chana, jóbánama jtsemnana ca.’

¹¹ Pero tšěngaftanga šmondbétsichamo, canŷe entšá yobena chabe taitá o chabe mamá jáuyanana: ‘Lempe sěndbomna soyěnga corbán entsemna, chíyeca ndoñe quetsátobena juajabuáchana ca’ (corbán endayana “Běngbe Bětsabiama uátšěmbona soyěnga ca”). ¹² Tšěngaftanga šmondbétsichamo, nda chca tojayaněse, ya ndoñe obligaciólnaca ntsemnana chabe taitá o mamabiama ndayánaca jamama ca. ¹³ Chca, tšěngaftanga šmontsama entšanga Běngbe Bětsabe palabra stětsoye chamoquedama, mo tondaye

tontsamancá, chë cuenta jtsamama ntšamo anteunga imojanamancá, ntšamo entšángbeñe tempšana y mēntscoñama yochñējuancá. Y ba soyënga tšëngaftanga cachcá šmontsama ca” — Jesús tojánayana.

¹⁴ Chora Jesús, cachiñe entšanga tojtanachembo y tojanëyana: “Njëtsçanga šmochjouena y chacmësertá. ¹⁵ Ndayá entšá tojtsesacá, ndoñe ntjábemana ndoñe tšabia Bëngbe Bëtsabe delante. Injëtsá comna: ntšamo entšá tojtsejuabná y tojtsoyebuambnacá endobena jabemana ndoñe tšabia Bëngbe Bëtsabe delante. ¹⁶ Chë jouenama tmojtsobenënga, šmochjouena ca” — cha tojánayana.

¹⁷ Jesús entšanga tojëftsanabashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayana. ¹⁸ As cha tojanëyana: “¿Tšëngaftángnaca cabá ndoñe cmontsésertana ca? ¿Cabá ndoñe cmontsésertana, lempe ntšamo entšá tojascá ndoñe ntsobenana chábioye jabemana ndoñe tšabia Bëngbe Bëtsabe delante; ¹⁹ er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana njëtsca sananga tšabá jasama yomna ca y chë saná ndoñe ntjamana canye entšá bacna soye chaotsamama ca. ²⁰ Y mēntšánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena entšá jabemana ndoñe tšabia Bëngbe Bëtsabe delante. ²¹ Er ainanocana jtsóbocanana bacna juabnënga:

shembásaftaca o boyabásaftaca bacna soye jamama, jatbëbama, jóbama, ²² bacna juabnënga boyá o shémbioye ínÿaftaca jáingñama, jtsatbomnayama, nÿetsca bacna soyënga jamama, ínÿenga jáingñama, nÿe cachá jenomándama ntsobencá jtsiyenama, ínÿabioye jtsántšabošama, ínÿabiamama jtsayátšenayama, jtsenábotamnayama y nÿe opënga jtsobiamnayama. ²³ Nÿetsca quem bacna soyënga entšabe ainanocana jóbocnana, y cha jabemana ndoñe tšabia Bëngbe Bëtsabe delante ca” –cha tojánayana.

*Canÿe shembása inÿe luarocana ashjagoná
Jesúsbeñe yojtsošbuaché*

(Mt 15.21-28)

²⁴ Jesús chentšana, Tiro ca uabaina luaroye tojtsanoñe, y canÿe yebnentše tojánamashëngo. Cha yojtseboše ndocná chama chaondëtsetatšëmbuama; pero ndoñe yonjobenaye iytëmenana jatsmënana. ²⁵ Y betsko, canÿe shembása, canÿe bembe bacna bayëjbe juabna uambayá ibnabomná, Jesusbiamama oyebuambnayana vojouena ora, chábioye tojánabo y chabe shecuatšentše tojanoshëntsamentšé. ²⁶ Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetëmbentšana bacna bayëja chabuatábocnama. ²⁷ Pero Jesús tbojaniyana: –Atše šondmëna natsana judío entšangbiamama chë soyënga jamana; chentšana cocayé chanjobenaye chca inÿe entšangbiamama jamana. Atše acbiamama, canÿe ndoñe judiá,

soyënga stjamëse, nántsemna mo chë básengbe saná quešënga cuaftsëbuajocá ca.

²⁸ Y cha tbojanjuá: —Arseñor, chca jtsemnana. Pero chë quešëgnaca mondbase chë básenga tmojttesá ora tmojatquécjanatemënga. Chcasna, Diosmanda átšnaca šmotsajabuache ca.

²⁹ As Jesús tbojanianyana: —Tšabá tcjayana; chcasna, acbe yebnoye motsatoñe. Chë bacna bayëja acbe bembetëmbentšana tonjësebocna ca.

³⁰ Chentšana, chë shembása chabe yebnoye tojtaná, y tbojáninýena chë bembetema jutsnëshentše yojtsojájone, y chë bacna bayëja ya ndoñe chábeñe yontsemna.

Jesús, canýe boyabása tësmá y ndëbiábioye tbojan-shná

³¹ Tiro pueblentšana Jesús tojëftsanbocna, y Sidón y Decápolis luarentša pueblënguëjana jachnënguse, Galilea uafjajónayoye tojánashjango.

³² Cha chentše yojtsemna ora, chábioye tmojanánatse canýe entšá tësmá y ndëbiá, y tmojanimpadá chabe cucuatšënga chë šocábeñe chaojájoma, chaboshnama.

³³ Chorna Jesús entšángbentšana luaroye tbojanánatse, cánýata. Chora chë šocabe matscuašoye ntšabuafjënga yojajué, cucuatšiñe yojabuashëtjo, y chë šocabe bichtaja yojábojajo. ³⁴ Chentšana, Jesús celoye tojanontješé, jabuache yojáshachna, y hebreo palabriñe tbojanianyana: “¡Efata ca!” (Chca endayana “¡Chacmotsauenana ca!”)

³⁵ Cachora, chë boyabásabe matscuaše tšabá yojtsatsmëna y tšabá yojtsuenana; chë bichtaja tšabá yojtóbema y tšabá yojtsóyebuambnaye. ³⁶ Y Jesús

chë entsanga tojanamëndá chama ndocnábeñe ntsecuéntayana. Pero masque tša chama yojtsamëndaye, entsanga más chabiamá imojtsencuéntaye. ³⁷ Chama chë entsanga puerte imojtsenjnanaye, y mëntšá imojtsichamo: “¡Lempe tšabá entsama! Chë tšmënga chamouenama, y chë ndëbianga chamóyebuambama entsama ca.”

8

Jesús canta uaranga entsanga saná tojanacaredadó
(Mt 15.32-39)

¹ Chë tempo, ba entsanga Jesúsbioye cachiñe tmojanobeconá, y jasama tondaye imontsebomna. As Jesús chabe uatsjéndayënga tojánachembo y tojanëyana: ² —Quem entsangbiama šontsengmena, er ya unga te átšeftaca montsemna y mora jasama tondaye quemátsbomna. ³ Cachëngbe yebnoye tondaye ntjascá stichamuase, shëntsama benachëjana nantsabuatëcja; y báseftanga bën luarocana tmojabo ca.

⁴ As chabe uatsjéndayënga tmojanianyana: —¿Ntšamo nda nanjobenaye quem luarentše, ndocna entsá ndoyenentše, chëfta entsangbiama saná jinÿenama ca?

⁵ Chora cha tojanatjá: —¿Bueta tandëše šmojtsebomna ca?

Y chënga tmojanjuá: —Canÿsëftaše ca.

⁶ Chentšana, Jesús tojanamëndá entsanga chamoshëntsjatbiamama. Chorna, chë canÿsëfta tandëše tojanca y Bëngbe Bëtsábioye

chama tbojtanchuá. Chentsana tojanjatá, chabe uatsjéndayënga tojanëjatá, y chëngna chë entsángbioye. ⁷ Básefta beonatémëngnaca imnabomna; as Jesús, Bëngbe Bëtsábioye chama tbojtanchuá y chabe uatsjéndayënga tojanamëndá entsanga jujátayama. ⁸ Nÿetscanga tmojanse jtoshachaye nÿetsá. Chentsana cabá canÿsëfta bëts sbarëcua tmojanajutjé chë ojamnëtémëngaca. ⁹ Chë tmojansënga imojamna mo canta uaranga nÿetsá. Chentsana Jesús chë entsanga tojtanadiosoftá. ¹⁰ Chora Jesús barquëshañe tojánenojayiye chabe uatsjéndayëngaftaca, y tmojtsanoñe Dalmanuta ca uabaina luaroye.

Chë fariseunga tmojánbošena, Jesús chaoma canÿe bëts soye, chabe ndegombre obenana jinÿyama (Mt 16.1-4; Lc 12.54-56)

¹¹ Chentsana, fariseunga tmojánabo y tmojanontsé Jesúseftaca enatsëtsnayana. Y jisháchichiyama, imojtseimpadana canÿe bëts soye chaoma, as jtsetatšëmbuama Jesusbe obenana Bëngbe Bëtsábiocana ndegombre tainóbocanama. ¹² Y Jesús ngmënaca, jabuache yojáshachnëse, mëntšá tojánayana: “¿Ndáyeca tšëngaftanga, chë mora oyenënga, šmojtseboše canÿe bëts soye chaimama tšëngaftanga atšbe obenana jinÿanÿiyama ca? Ndegombre cbëyana, quem entsanga ndocna chca soye quemochátinÿe ca.”

¹³ Chorna chë entsanga cachcá tojesanënÿá, chë barquëshoye yojtamáshëngo, y uafjajónaye chenguana yojtsoñe.

Jesús tojanabuayená fariseungbe buatëmbana soyëngama

(Mt 16.5-12)

¹⁴ Chë uatsjëndayënga yojésebnëtjomba ndaye soye jasama jesocñama, y chë barquëshoye nÿe canÿe tandëse imojtsebomna. ¹⁵ Jesús tojanëyana: —Smochtsantjesna; cuedado šmochtsebomna fariseunga y Heródesbe levadurama ca.

¹⁶ Chora chë uatsjëndayënga tmojanontsé enatsëtsnayana: —Chca entsichamo, bënga tandëse ndoñe tmonjesocñama ca.

¹⁷ Jesús yojtsetátšëmbo, chabe uatsjëndayënga imojtsejuabnaye chana tandësama yojtsëtsësnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyënga jtsamëse imojoyenama. Chcasna, mëntsá tojanëyana: —¿Ndáyeca tandësama šmojtsoyebuambná? ¿Cabá ndoñe cmontsësertana, ni šmontsetátšëmbo? ¿Ainanoca ndoñe šmontseboše chacmësertama? ¹⁸ Bominÿe šmondobomna, pero ndoñe quešmátobena jinÿana; jouenama šmondobena, y ndoñe quešmátuenana, y ndayá tijamama ndoñe quešmatsjuabná.

¹⁹ Chë shachna uaranga entšanga shachna tandësentšana sënjanëjatá chentšana, ¿bueta sbarëcua chë ojamnëtemëngaca šmënjanajutjé ca? —cha tojanatjá.

Y chënga tmojanjuá: —Bnëtsana utácua ca.

²⁰ —Y chë canÿsëfta tandësentšana canta uaranga entšanga sënjanëjatá chentšana, ¿bueta bëts sbarëcua chë ojamnëtemëngaca šmënjanajutjé ca?

Y chënga tmojanjuá: —Canÿsëftácua ca.

21 As Jesús tojanéyana: —¿Y cabá ndoñe cmontsésertana ca?

Jesús canye jtanábioye tbojanshná, Betsaida puebloca

22 Chentšana tmojánashjajna Betsaida puebloca; y chora, entsanga canye boyabása jtaná Jesúsbioye tmojanánatse, y tmojanimpadá cha jaboajuana chabotseshnama.

23 As, chë jtanábioye tbojanábuacueshache, y chë pueblo chaboye tbojanánatse. Chorna, yebuáyeca ibojabuchanëtjo, y chábeñe cucuatšënga yojajájua, y tbojantjá nderado ndayá jinýama tayojsanobena ca. 24 As chë jtaná yojontješiye y tojánayana: —Boyabásenga sentsénýa; mo betiyëngcá montsemna, pero montsobonjná ca.

25 Chora Jesús, chë jtanabe fšněbeñe cachiñe cucuatšënga yojajájua. Y chë boyabása yojtsobena lempe tšabá jinýama; ya shnaná yojtoquéda. Y yojtsobena nýetsca soyënga botamana jinýana. 26 Chentšana, Jesús cachabe yebnoye tbojtanichmó y mëntšá tbojaniyana: —Chë puebloye ndoñe catjëftsamashëngo ca.

Pedro tojánayana, Jesús chë Cristo bétsemnama (Mt 16.13-20; Lc 9.18-21)

27 Chentšana, Jesús tojánbocna chabe uatsjéndayëngaftaca Cesarea de Filipo luaroca pueblëngoye, y benachiñe chabe uatsjéndayënga tojanatjá: —¿Nda atše bétsemnama ca entsanga imojtsichamo ca?

28 Y chënga tmojaniyana: —Inýënga montsichamo Juan chë Ubayaná ca, ínýënga

Elías ca, y ínÿengna, canÿe Bëngbe Bëtsabe juabna oyebuambnayá ca.

²⁹ As Jesús tojanatjá: —Y tšëngaftangna, ¿nda atše bëtsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

³⁰ Chentšana Jesús corente chënga tojanamëndá, chë nda cha yojamnama ndocnábeñe ntsecuéntayana.

Jesús tojánayana cha ibojamna jóbanana y jt-sayenana cá

(Mt 16.21-28; Lc 9.22-27)

³¹ Y Jesús tojanontsé chabe uatsjëndayënga jabuátambana, cha, chë Bëngbe Bëtsá Entšá tbojanbemá, ibojamna puerta jasúfriana ca; chë judiëngbeñe bëtšëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayena ca. ³² Nÿetscanga catafjosertaycá chama yojtšóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana. ³³ Pero Jesús yojobuértana, chabe uatsjëndayënga tojanënyänyé, y Pédrëbioye mëntšá tbojtsanbochembo: “¡Satanás, átšbentšana mojuaná! Pedro, acbe juabnënga Bëngbe Bëtsábíocana ndoñe quenatóbocana, sinó nÿe entšángbentšana ca.”

³⁴ Chentšana, Jesús chabe uatsjëndayënga y chë inÿe entšanga tojánachembo chamouenama, y tojanëyana: “Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena

sempre chabe vidiñe jtsemándayana ca, chabe quem luarentša soyënga cachcá chauesonýá atše juastama, y atšbiamá jasúfriama chaotseprontana y cruciñe jobanámna. ³⁵ Nda tojtsama quem luarentše bëtscá soyënga jtsebomnama y atšbiamá jasúfriama ndoñe tontseprontana, chë nyetsca tescama yomna tšabe vida echanjopérdia. Pero nda quem luarentša soyënga cachcá tojéftsonýá atše juastama, y chë tšabe noticiënga atšbiamá abuátambaye causa, masque chaóbana, chë nyetsca tescama yomna tšabe vida echántsebomna. ³⁶ ¿Ndayama entšá buanjósérvia nyetsca quem luarentša soyënga jtsebomnana, chë nyetsca tescama yomna tšabe vida tojtsoperdese? ³⁷ Er canýe entšá chë nyetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nyetsca tescama yomna tšabe vida jtsebomnama. ³⁸ Chcasna, nda mora atšbiamá y atšbe buayenana soyëngama tojtsëuatja entšángbeñe, chënga chë Bëngbe Bëtsabiamá nduauenanënga y bacna soye amënga, chë Bëngbe Bëtsá Entšá tbojanbemánaca chabiamá echantsëuatja, chabe Taitabe bëts obenánaca y chabe angelëngaftaca chaojésabo ora ca” –cha tojanéyana.

9

¹ Mëntsánaca Jesús tojanéyana: “Ndegombre cbëyana, báseftanga muentše montsemnënga ndoñe quemochatóbana, Bëngbe Bëtsá entšángbeñe chabe obenánaca jabomándama jabana ntjéftsinýcá ca.”

Jesús inyetśá tojanobinŷná
(Mt 17.1-13; Lc 9.28-36)

² Chentsana chnĕnguana tianoje, Jesús tojĕftsanĕbiatśe Pedro, Santiago y Juan, y ínŷoye tojanĕnatse nŷe chĕnga, canŷe bĕts tjoje. Y chĕngbe delante Jesús inyetśá tojanobinŷná; ³ chabe uichĕtjonĕjuangá tśa yojtsabuashinŷinŷana; corente uafjantsĕjuangá yojtsamna; nŷa chca juafjantsama ndocná quem luarentśe quentatobenaye. ⁴ Chca orna, chĕ uatsjĕndayĕnga tmojáninŷe, Moisés y Elías tbojanobinŷná Jesúseftaca encuĕntaye.

⁵ Chora Pedro, Jesúsbioje tbojanianyana: “¡Buatĕmbayá, tśa tśabá bĕngbiana cuanmĕna muentśe jtsemnana ca! Mora fchanjapórma unga tambotĕmĕnga: cánŷetema acbiana, ínŷetema Moisesbiana y ínŷetema Elíasbiana ca.”

⁶ Chca tojánayana, chĕ uatsjĕndayĕnga yapa au-atjanánĕnga imojtsemna causa, y Pedro ndoñe yontsetátśĕmbo ntśamo jayanana. ⁷ Chora canŷe jantśetĕshe yojóbema, y chĕngbioje yojáutsbotse; y chĕ jantśetĕshoicana canŷe oyebuambnayana tojanóbocna, mĕntśá: “Mua atśbe bonshana Uaquiñá endmĕna; cha śmochtseyeunana ca.”

⁸ Y ndeolpe, chĕngbe shĕconana tmojanrrepará ora, ya ndocná más tmonjáninŷe; nŷe Jesús canŷa chĕngaftaca yojtsemna.

⁹ Chĕ tjocana imojtsatstsmaye ora, Jesús chĕ uatsjĕndayĕnga tojanamĕndá: —Bĕngbe Bĕtsá Entśá tbojanbemá obanĕnguentśana candĕtayanĕntscuana, chĕ mĕnté tjoca śmonjinŷe soyama ndocnábeñe śmattsecuĕntaye ca.

10 Chë uatsjéndayënga aíñe chca tmojanuena; pero chënga imojtsentjanaye ndayá cha yojtsentšáyana, cha yochtanayena ca cha tojánayana ora. 11 Y Jesúsbioye imojtsetjanaye: — ¿Ndáyeca chë ley abuátambayënga mondbétsichamo, canmëna Bëngbe Bëtsabe Uámana Uabuayanabe natsana Elías jabana ca?

12 As cha tojanëjua: — Ndegombre, canÿa Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Bëngbe Bëtsabe uabemana palabrenguiñe endayancana, Bëngbe Bëtsá Entšá tbojanbemá puerte caochjasúfria, y ínÿenga puerte camochtsáboyënja ca. 13 Ndegombre cbëyana, canÿa Eliascá ya tonjabo, y cháftaca entšanga tmonjanma lempe ntšamo tmojabošencá, ntšamo chaochnënguama Bëngbe Bëtsabe uabemana palabrenguiñe endayancá.

Jesús, canÿe basa bayëjbe juabna uambayábioye tbojanshná

(Mt 17.14-21; Lc 9.37-43)

14 Chentšana, chënga tmojtaná chë inÿe uatsjéndayëngbioye. Chora, Jesús tojáninÿe ba entšanga chë uatsjéndayëngbe shëconana imojtsemnama, y básefta ley abuátambayëngna chëngaftaca imojtsenatsëtsnaye. 15 Nÿetsca entšanga cha tmojáninÿe ora, imojenjaná y tmojanótjajo cha jachuayama. 16 Chora Jesús chënga tojanatjá: — ¿Ndayama chëngaftaca šmenatsëtsná ca?

17 Y canÿa entšanguentšá tbojanjuá: — Buatëmbayá, muentše ácbioye sënjuánatse atšbe uaquiñá; bacna bayëjbe juabna entsambá, y

chë causa, jóyebuambayama ndoñe quenátobena.
 18 Nýe ndayéntsñaca cha tojtsemnentše, chë bayëja chábioye jishachana y jtsenajuáchesënjana; chentše uayoicana shashiye jtsabocanana, jtsenoftěšfjojnayana y obanacá jtsatsjájonana. Acbe uatsjéndayënga sënjaimpadá chë bacna bayëja chamuatábocnama, pero ndoñe chematobená ca —cha tbojaniyana.

19 As Jesús tojánayana: —¡Nýetsá ndošbuáchiyënga ca! ¿Buetayté šojtsemna tšëngaftangaftaca jěftsemnana? ¿Buetayté uantado tšëngaftangaftaca chjěftsemna? ¡Moye chë básetema mánatse ca!

20 Chora chë básetema chábioye tmojanánatse; y chë bayëja Jesúsbioye tbojáninýe ora, tojanma chë basa ataque chaboshachama, y chë basa fshantsoye yojashajaye, yojtsojanduounaye y uayoicana shashiye yojtsábocana. 21 As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjuá: —Básetema orscana chca; 22 ba soye, chë bayëja chábioye iñoye jtsatmetšana y buyeshoye jtashbuetšana, jtsóbama. Chíyeca, nderado ndayá chabiamama jamama tcojtsobenëse, bënga šmotsalastemá y šmotsějabuache ca.

23 Chora Jesús tbojaniyana: —¿Ndáyeca “ndayá jamama tcojtsobenëse ca” šcjauyana? Nda Bëngbe Bětsábeñe tojtsošbuáchebiamama lempe endopodena ca.

24 Y cachora chë básabe taitá tojanáyebuachena: —Aíñe, Bëngbe Bětsábeñe sëntsošbuaché; Dios-manda, ¡más jtošbuáchiyama šmajabuache ca!

25 Y bětscá entšanga imojtsójotoma Jesús tojáninýe ora, chë bacna bayëja tbojtsanbochembo

mëntšá: —¡Bacna bayëja, chë básetema tësma y ndëbiá biamnayá; chábentšana maisebocna y ndocna te más chábeñe catjésamashëngo ca!

²⁶ Y chë bayëja chábentšana yojésebocna, yojtseyoye y chë básabioye jabuache ibojeseshatiyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca. ²⁷ Pero Jesús tbojanábuacueshache y tbojtanatsbaná; y chë básana yojtëtsaye.

²⁸ Chentšana, Jesús canye yebnoye tojánamashëngo, y chabe uatsjëndayëngna luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

²⁹ Y Jesús tojanëjua: —Chca bayëjënga jtëbuacanamna jobenayana nye Bëngbe Bëtsáftaca jencuéntase, chabuájabuachama jaimpádase ca.

Jesús cachiñe tojánayana cha ibojamna jóbanana y jtayenana ca

(Mt 17.22-23; Lc 9.43-45)

³⁰ Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná chaondëtsetatšëmbuama, ³¹ er cha chabe uatsjëndayënga yojtsabuátambaye. Mëntšá cachabiana yojanëtsëtsnaye: “Bëngbe Bëtsá Entšá tbojanbemá entsangbe cucuatšinë mochanjáboshjona; mochanjóba, pero chentšana unga tianoye echántayena ca.”

³² Pero chënga ndoñe yontsósertana ntšamo Jesús yojtsanëtsëtsnacá, y chama jatstjanayamna chënga imojtsauatja.

¿Nda chë más uamaná yomna?

(Mt 18.1-5; Lc 9.46-48)

33 Chora Capernaum puebloye chënga tmojánashjajna; y cach yebnentse imojtsemna ora, Jesús chë uatsjéndayënga tojanatjá: “¿Ndayama benachiñe šmabáyenatsëtsnaye ca?” 34 Chëngna nÿe iytëca tmojanobiama, er benachëjana chënga imnayénatsëtsnaye, chënguentsá nda chë más uamaná bëtsemnama. 35 As Jesús tojanótbema, chabe bnëtsana uta uatsjéndayënga tojánachembo y tojanëyana: “Ndánaca nÿetscangbiama chë más uamaná jtsemnama tojtsebošëse, cha chë más nduamaná chaóbema y nÿetscanga chaotsaserverna ca.” 36 Chora Jesús canÿe bášetema tbojánishache, chëngbe tsëntsaca tbojanatsá, tbojantbá y chënga tojanëyana: 37 “Ndánaca, átšbeñe ošbuachiyá bëtsemnayeca, tbojofja canÿa mo quem basetemcá, chana atše jofjana; y nda atše šojofja, chora cha nÿe atše ndoñe ntjofjana, sinó chë šojichmó chábioynaca jofjana ca.”

Nda ndoñe bëngbe contra tontsemná, bëngaftaca jtsemnana

(Mt 10.42; Lc 9.49-50)

38 Juan, Jesúsbioye tbojanianya: —Buatëmbayá, bënga fsënjinye canÿe boyabása, y cha aca jótšëmbonëse, bacna bayëjbe juabna entšángbentsana endëtëbuacana; pero cha bëngaftaca ndoñe quenátsmëna causa, chama fsënjesyauaná ca.

39 As Jesús tbojanjuá: —Ndoñe šmatjuauyaná; er ndocná quenátobena canÿe bëtš soye jamana Bëngbe Bëtšabe obenánaca, atše jótšëmbonëse, y chentšana atšbe contra jatóyebuambnayana.

40 Ndegombre, nda ndoñe bëngbe contra

tontsemná, bēngaftaca jtsemnana. ⁴¹ Y ndánaca, masque n̄ye búyeshtema t̄sēngaftanga tcmojubuatšatá, t̄sēngaftanga átšbenga bētsemnayeca, chábioye Bēngbe Bētsá can̄ye uacanana soye bochántatšetaye, cha chē t̄sabe soye tojamama ca.

Resjo yomna, nderado bacna soyēnga cuanjama (Mt 18.6-9; Lc 17.1-2)

⁴² Chentšana Jesús tojánayana: “Can̄ya átšbeñe ošbuachiyábioye mo quem basetemcá, nda tbojaingñé atše ustonama chaotsajbanama, más t̄sabá chabiana nántsemna can̄ye bēts nantsnēbé chamotsetamošēntšbua y mar bėjayoye asentoye chamotsashbuetše chabotsenatjēmbama.

⁴³ Nderado acbe cucuátšeca bacna soye tcojama, más t̄sabá nántsemna chē cucuatše chacotsenacuéstjango. Acbiana más t̄sabá endmēna celoye jamashēnguana n̄yetsca tescama vida jtsebomnama, n̄ye can̄ye cucuatše bomná, y ndoñe n̄yets útātšeca infiernoje chacmotocá jama, chē ndocna te yochanjáfsana íñeshoye; ⁴⁴ choca útšenēnga puerte n̄yetsca tescama mochanjasúfria. Chēngbioye mochtsasaye mamanga ndocna te quemochatóbana, y chē íñeshe ndocna te queochátsfsana.

⁴⁵ “Nderado acbe shecuátšeca bacna soye tcojama, acbiana más t̄sabá nántsemna chē shecuatše chacotsenashecuástjango. Acbiana más t̄sabá endmēna cosheto celoye jamashēnguana n̄yetsca tescama vida jtsebomnama, y ndoñe n̄yets útātšeca infiernoje chacmotsētšena; ⁴⁶ choca útšenēnga puerte n̄yetsca tescama mochanjasúfria.

Chěngbioye mochtsasaye mamanga ndocna te quemochatóbana, y chě íñeshe ndocna te queochátsfsana.

⁴⁷ “Nderado acbe bomínÿeca bacna soye tcojinÿe y cachca soye tcojama, más tšabá nántsemna chě bominÿe chacotsenobuchjátsëca. Acbiama más tšabá endmëna Běngbe Bětsabe aměndayoye jamashěnguana nÿe canÿe bominÿe bomná, y ndoñe nÿets útabeca infiernoye chacmotsětsena; ⁴⁸ choca útseněnga puerte nÿetsca tescama mochanjasúfria. Chěngbioye mochtsasaye mamanga ndocna te quemochatóbana, y chě íñeshe ndocna te queochátsfsana.

⁴⁹ “Tamó tšabe soye endmëna. Ntšamo chě tamó canÿe tšabe soye endměncá, Běngbe Bětsá echanjama nÿetsca tšěngaftangbiana tšábenga chašmotsemnama, chě átsbeñe betsošbuáchema šmojtsepadecena ora šmojauantase. ⁵⁰ Tamó tšabe soye endmëna. Pero chě tamó fténana tojtsóbeměse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entšangbiana šmochtsemna, chěngbeñe jtsiyeněse ntšamo Běngbe Bětsá yobošcá, y nÿetscángaftaca natjěmbana šmochtsiyena ca” –cha tojánayana.

10

Ndayá Jesús tojanabuatambá bouamněnga tmojtsenětsenama

(Mt 19.1-12; Lc 16.18)

1 Chentšana, Jesús chë luarentšana tojëftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chënga yojsabuátambaye, chë ntšamo jamana yojanamancá. 2 Básefta fariseunga chábioye tmojanobeconá, y jisháchichiyama mëntšá imojtsetjanaye: —¿Queojtselesenciana canye boyá chabe shémbioye cachcá jesonÿayama ca?

3 Chora cha tojanëjua: —¿Ntšamo Moisés chë soyëngama tcmëñjanamëndaye ca?

4 Y chënga tmojánayana: —Moisés tojanalesencia chë boyá chabe shémbioye chabuiyé canye tsbuanácha, ndayëchañe chaotsayana cha ya ndoñe chabe shema yontsemna ca, y chora cachcá chabe shema chabuesonÿá ca.

5 Chora Jesús tojanëyana: —Tšëngaftanga Bëngbe Bëtsabe mandënga ainaniñe jóyëngacñama ndoñe quešmátsboše causa, Moisés chca tšëngaftanga tcmojëftsanamëndá. 6 Pero quem luare jobojátšama orna, “Bëngbe Bëtsá canye boyabása y canye shembása tonjánabiana. 7 Chiyeca, chë boyabása chabe taitá y chabe mamá echanjésabashejuana, chabe shémaftaca jenútanama, 8 y chë útatna mo canÿacá bochántsemna.” Y chca, ya ndoñe útata quebochátsmëna, sinó nÿe mo canÿacá. 9 Chcasna, entšá ndoñe chaondëndbema ndayá Bëngbe Bëtsá mo canÿiñcá tojëftsema soye ca —cha tojánayana.

10 Ya cach yebnoca imojtsatsmëna ora, chabe uatsjëndayënga cach soyama imojtëtstjaye. 11 Y Jesús tojanëyana: “Nda chabe shémbioye cachcá tbojesonÿá y ínÿaftaca tojtóbouamase,

cha chë natsana shémbioye inye shembásaftaca jtseíngñayana; chana canye uabuatmá jtsebomnana. ¹² Y chë shema chabe boyábioye cachcá tbojesonýá, y inýaftaca tojtóbouamase, chánaca chë natsana boyábioye inýaftaca jtseíngñayana; canye uabuatmá jtsebomnana ca” —Jesús tojánayana.

Jesús, basetémëngbiana Bëngbe Bëtsábioye tbojanimpadá

(Mt 19.13-15; Lc 18.15-17)

¹³ Entšanga, basetémënga Jesúsbioye tmojanënatse, chauabájajuama y Bëngbe Bëtsábioye chëngbiana chaboimpadama; pero chabe uatsjëndayëngna tmojanontsé chë basetémënga unachayënga jtsëcácanana. ¹⁴ Jesús chca tojáninye ora, tojánetna y chë uatsjëndayënga tojanéyana: “Cachcá mónýaye chë basetémënga átšbioye chamuabo y ndoñe matëuyanana; er Bëngbe Bëtsabe amëndayana endmëna chë mo quem basetemëngcá imomnëngbiana.

¹⁵ Ndegombre cbëyana, nda Bëngbe Bëtsabe soyënga ndoñe tonjóyëngacñe mo canye basetemcá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

¹⁶ Y chë basetémënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tsabe bendicionënga chëngbeñe chaotsemnama.

Canye bomna entsá Jesúsbioye tojána

(Mt 19.16-30; Lc 18.18-30)

¹⁷ Jesús jama tojtëtanontsé ora, canye boyabása chábioye tojanótjajo, chabe shecuatšëntše

tojanoshentsamentšé, y mēntšá tbojantjá: —Tšabe Buatēmbayá, ¿ndayá šojtsemna jamana chē nyetsca tescama yomna tšabe vida jtsebonnama ca?

18 Y Jesús tbojanjuá: —¿Ndáyeca “tšabia ca” šcjauyana? Tšabia nýe canya endmēna: Bēngbe Bētsá. 19 Aca icotátšēmbó Bēngbe Bētsá tojanmandacá: “Ndoñe catjóba, acbe shema ínÿaftaca ndoñe cattseíngñaye, ndoñe catjatbēba, ndoñe catjuaboínÿena, ínÿengbioye ndoñe catjáingñaye ndayánaca jabacama, y acbe bētsétsata ndoñe stētšoye catjáquedaye ca.”

20 Chora chē boyabása tbojanjuá: —Buatēmbayá, atše lempe chē mandēnga básetema orscana sēndocumplina ca.

21 Jesús bonshanánaca tbojanonÿinÿé y mēntšá tbojaniana: —Canýe soye cmontsebuáshbena jamana: Motsa, lempe ntšamo icobomncá cochjetsatobuiye, y chē crocénana, ndbomnjémēnga cochtsatšataye; chca, celoca canýe bēts bomnana cochántsebonna. Chentšana, cochjabo y šcochjuasto ca.

22 Pero chē bobóntsbioye inÿetšá ibojtsínÿnana Jesús chca tbojanianama; y puerte ngménaca yojtá, cha puerte bomná inamna causa.

23 Chora Jesús cátoye tojanrrepará y chabe uatsjéndayēnga tojanéyana: —¡Puerte totcá entsemna bomnēngbiana Bēngbe Bētsabe amēndayoye jamashēnguama ca!

24 Chca imojouena ora, chē uatsjéndayēnga ojnánánēnga imojtsemna, pero Jesús cachiñe tojanoyebuambá y mēntšá tojanéyana: —Atšbe básēnga; ¡puerte totcá entsemna Bēngbe Bētsabe

amëndayoye jamashënguama! ²⁵ Ndegombre, más paselo endmëna chë coshufjentša atëfjnëjana canyë camello chauachnëngo, y ndoñe canyë bomná Bëngbe Bëtsabe amëndayoye jamashënguana ca.

²⁶ Pero chë uatsjëndayënga nye más imojtsenjnanaye y imojtsentjanaye: —¿As, nda yochjobenaye atsbocaná jtsemnana ca?

²⁷ Chora Jesús tojanënyänyé y tojanëyana: — Entšanga ndoñe quemátobena jamana canya atsbocaná chaotsemnana, pero Bëngbe Bëtsá aíñe; er Bëngbe Bëtsá lempe jamama endobena ca.

²⁸ Chora Pedro tbojaniyana: —Aca contsonjá, bënga lempe chë fsëndbomna soyënga fsënjéseboshjona y ácaftaca fsëntsajna ca.

²⁹ As Jesús tojánayana: —Ndegombre cbëyana, ndánaca átšbioye jaserviama y chë tšabe noticiënga jábuayenama, tojëseboshjona chabe yebna, catšátanga o uabénanga, bebmá o befta, o básenga, o fshantsënga, ³⁰ cha mora quem luarentše echanjójyëngacñe chama patse soye más yebnënga, catšátanga, uabénanga, bebmanga, básenga y fshantsënga, masque puerte chaosufrima ínënga mochántsama; y chë inye luarocna, chë nyetsca tescama yomna tšabe vida echanjónyëna. ³¹ Pero banga, mora uámanënga imomnënga, nduámanënga mochántsemna; y banga, mora nduámanënga imomnëngna, uámanënga mochántsemna ca —Jesús tojánayana.

Jesús cachiñe tojánayana cha jóbana y jtayenama

(Mt 20.17-19; Lc 18.31-34)

³² Chentsana Jerusalenoye imojtsaye, y Jesús yojtsebnatsana. Chë uatsjéndayënga puerte ojnánënga imojtsemna, Jesús ndauatjca choye yojtsayama; y inye beca entsanga ústonoye imojtsajnënga, imojtsayáuatja. Jesús cachiñe chabe bnëtsana uta uatsjéndayënga barie tojánachembo y tojanontsé jáuyanana ntšamo cháftaca jopásama yojtsemnana. ³³ Mëntsá tojanëyana: “Tšëngaftanga šmontsonjá, Jerusalenoye bënga mora montsajnama. Chocna, chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšine mochanjáboshjona, y chënga mochanjayana cha chaóbana ca; y ndoñe judiëngbe cucuatšine mochanjáboshjona. ³⁴ Chënga mochantsáboyejuana, mochántsebuashëttoj, mochántsetjanja y mochanjóba, pero chentsana unga tianoye cha echántayena ca.”

Santiago y Juan, Jesús tmojanimpadá canye pavor cháuabiamama (Mt 20.20-28)

³⁵ Chora, Santiago y Juan, Zebedeobe uaquiñata, Jesúsbioye tbojanobeconá y tmojaniyana: —Buatëmbayá, bëndata fsëntseboše pavor chašcuabiamama ntšamo chacbojaimpadacá ca.

³⁶ Y Jesús tojanatjá: —¿Ndayá šojtseboše atše tsëndatbiamama ca?

³⁷ Y chata tbojaniyana: —Aca reycá chacojtsamánda ora, cochjaleséncia bëndata fchayobená jótbemana, canya acbe catšbioica y inya acbe uañicuayoica ca.

³⁸ As Jesús tojanéjua: —Ntšamo šmontsotjanañama tsëndata ndoñe quešnátstatsëmbo. ¿Ntšamo atše chaitsesufrincá, tsëndátnaca cachcá jasúfriama tašatjobenaye? ¿Y entšanga puerte bacá chacmojtsëbuatsená ora, tašochjauánta, ntšamo atše chjauantacá ca?

³⁹ Y chata tbojaniyana: —Aíñe fchanjobenaye ca.

Y Jesús tojanéyana: —Ndegombre tsëndátnaca atscá šochanjasúfria, y atšbe causa cmochántsamna bëtscá soyëngama jasúfria. ⁴⁰ Pero atše ndoñe quetsátobena jamándana nda atšbe catšbioica y atšbe uañicuayoica chaótbemama. Chë útentše entsemna ndëmuanyëngbiana atšbe Taitá tojaprontacá ca.

⁴¹ Chë inye bnëtsana uatsjëndayënga chca tmojanuena ora, tmojanontsé Santiago y Juánoftaca jotjáyanana. ⁴² Pero Jesús nyetsca uatsjëndayënga tojánachembo y tojanéyana: “Tšëngaftanga šmondétatsëmbo, quem luarentša amëndayënga lempe jtsemándayana, nya mo nduiñënga cuaftsemncá; y chë bëtsëtsa entšanga chëngbe obenánaca jtsemándayana, ntšámnaca jtsamëse, chë inye entšanga sempre chamotsayaunanama. ⁴³ Pero tšëngaftangbeñe ndoñe chca chaondëtsemna. Inyetsá; masna, nda tšëngaftangbeñe chë más uamaná jtsemnama tojtseboše, cha bontsemna chë inyënga jtsaservénana; ⁴⁴ y ndánaca tšëngaftanguentsá chë más uamaná jtsemnama tojtsebošá, bontsemna jtsemnana nyetscangbiana, mo nye inyabiama nyets tempo oservenacá. ⁴⁵ Cachcá, Bëngbe Bëtsá Entsá tbojanbemá ndoñe chenátabo cha

chamotseservénama, ndayá ínÿenga jabáserviama. Y mo nda, ínÿenga játsebacama cuafjopagacá, cha echanjóbana ba entšanga atsebácanënga chamotsemnama ca” —cha tojánayana.

*Jesús canÿe jtanábioye tbojanshná
(Mt 20.29-34; Lc 18.35-43)*

⁴⁶ Chentsana, Jesús y chabe uatsjéndayënga Jericó uabaina puebloye tmojánashjajna. Y Jesús chabe uatsjéndayëngaftaca y bëtscá entšángaftaca Jericó pueblentsana yojtšaisebocana ora, Timeobe uaquiñá, Bartimeo ca uabainá, canÿe jtaná lemošna otjanañá, benache juachañe yojtsetbemana. ⁴⁷ Y Jesús Nazaretocá chëjana yojtšachnëjuanama cha yojátatsëmbona ora, tojanontsé mëntšá uayebuáchana: —¡Jesús, Davídbentsana Entšá, šmotselastemá ca!

⁴⁸ Chorna, banga chë jtaná imojtsácacana iytëca chaóbemama. Pero cha más yojtšáyebuache: — ¡Davídbentsana Entšá, šmotselastemá ca!

⁴⁹ Chora Jesús tojantsá y chë ínÿenga tojanëyana: —Chë jtaná mochembo ca.

As chë jtaná tmojanchembo, y mëntšá tmojanianyana: —¡Añemo cochtsebomna; motsbaná! Jesús cmontsechembuana ca.

⁵⁰ Y chë jtaná, quefsaíya jtsenátsejquëse, yojtsënja y betscó Jesúsbioye yojobeconá. ⁵¹ Chora, Jesús chë jtanábioye tbojantjá: —¿Ndayá cojtseboše atše acbiamama chjamama ca?

Y chë jtaná tbojanjuá: —¡Buatëmbayá, šmolesenciá atše chašuatábínÿnama ca!

⁵² As Jesús tbojaniyana: –Motsatoñe. Tšabá jtsatsmënama Bëngbe Bëtsábeñe icošbuachéyeca, tšabá contsatsmëna ca.

Y cachora cha tšabá ibojtabinÿna, y Jesúsbioye benachëjana ibojtsëstona.

11

Jesús Jerusalenoye tojánashjango
(Mt 21.1-11; Lc 19.28-40; Jn 12.12-19)

¹ Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjëndayata tojanichamó, ² y mëntsá tojanëyana: “Tsëndatbe natsana entsemna base pueblotémoye motsata. Chašojáshjango y cachora šochanjínÿena canÿe burrotema utsbuaná; chábeñe cabá ndocná tonjenujayé. Sochjuajafjoná y šochjuánatse. ³ Nderado nda, ¿ndáyeca šmojtsanachá ca? chacmojátjase, šochjojuá: ‘Bëngbe Utabná bontsájaboto y chora bochantabáiseboshjona ca.’”

⁴ As chata tbojána, y tbojáninÿena chë burrotema tsáshenañe, canÿe bëšášañe utsbuaná, y imojjuajafjoná.

⁵ Y básefta entšanga chiñe imojtsemnënga, chátbioye tmojanëyana: “¿Ndayá šojtsama? ¿Ndayeca chë burrotema šojtsajafjná ca?”

⁶ As chata tbojanjuá ntšamo Jesús tojanëyancá; y chë entšanga tmojanalesenciá chë burrotema chamuánatsama. ⁷ Chentsana, chë burrotema Jesúsbioye tmojanánatse; chë burrotémbeñe chatbe entšayá tbojanájtse, y Jesús chábeñe tojanenujayé. ⁸ Bëts cá entšanga chëngbe entšayá chë

benachëjana imojtsanëtëtsatsana, y ínÿengna chë jajoca imojuatëtsetše buacuashangá chiñe imojuacjaye. ⁹ Y chë natsana imojtsajnënga y chë ústonoyënga mëntšá imojtsaiuáyebuache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá! ¹⁰ ¡Tša tšabá chë echanjóshjango amëndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

¹¹ Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe shëconana lempe yojëftserrepárase, y ya yojtseibétatana causa, chabe bnëtsana uta uatsjëndayëngaftaca tojëftsanbocna, Betania puebloye.

Jesús tojánayana canÿe betiye ndoñe más chaondëshájona ca
(Mt 21.18-19)

¹² Yëfsana, Betaniocana Jerusalenoye chënga imojtésajna ora, Jesús tbojánishëntsena. ¹³ Bënocana canÿe higo betiye yojinÿe; as tojána jontješiyama tainashajo o ndoñe. Pero nÿe tsbuanáchënga chiñe yojínÿena, chora ndoñe shajo tempo bëtsemna causa. ¹⁴ As Jesús chë higo betiyoye tojánayana: “¡Ndocna te más chaondëshájona entsanga chamosama ca!”

Y chabe uatsjëndayënga imojouena ntšamo cha tojanayancá.

Jesús, Bëngbe Bëtsabe bëts yebnentsana enënga y obuámnayënga tojtanëbuacna
(Mt 21.12-17; Lc 19.45-48; Jn 2.13-22)

15 Jerusalenoye tmojánashjajnentšana, Jesús Běngbe Bětsabe běts yebnoye tojánamashěngo, y tojanontšé chentšana jtěbuacnana chě chentše imojtsena y imojtsobuámnañěnga. Chěntšnaca imojtsemna entšanga caněe crocénana eněnga, y chě crocénana něe Běngbe Bětsabe běts yebnentšama inoservenana. Chě entšanga crocénana atrocayěngbe mesěshangá tojtsanenásatajchquěca, y chě palomatéměnga eněngbe tšeněšěngnaca; 16 y ndoñe tonjanalesenciá ndocná Běngbe Bětsabe běts yebnějana chě soyěnga chaotsěchnějuanama. 17 Y tojanontšé entšanga měntšá jabuátambana: “Ndegombre, Běngbe Bětsabe uabemana palabrěnguiñe cha měntšá tojánayana: ‘Atšbe běts yebna echantsabaina něetsca luarentša entšangbiama átšeftaca encuéntaye yebna ca’; pero tšěngaftangna atbėbaněngbe oyeniñe chě yebna šmojtsebema ca” —Jesús tojaněyana.

18 Chě bachnangbe más uámana aměndayěnga y chě ley abuátambayěnga tmojántatšěmbona ntšamo yojochněnguama; as tmojanontšé enójuabnayana ntšamo jobenayana cha jóbana, cha imojtsebiauatja causa, er něetsca entšanga imojtsenjanaye ntšamo cha yojanabuátambama. 19 Pero yojtseibétatana ora, Jesús chabe uatsjěndayěngaftaca chě běts pueblentšana yojesóbocñe.

Chě higo betiye tojtsanbuashá

(Mt 21.20-22)

20 Yěfsana cachěse, cachějana imojtėsachnějuana ora, tmojániněe chě higo betiye parejo tbětějěngaca yojtsebuashá. 21 Chora Pedro yojenójuaboye ntšamo yojopásama; as Jesúsbioye

tbojaniyana: —¡Buatëmbayá, minÿe; chë tconjayana ndocna te más tšabe betiye chaotsemnama betiye tojtsebuashá ca!

²² Y Jesús tbojaniyana: —Bëngbe Bëtsábeñe šmochtsošbuáchiye. ²³ Ndegombre cbëyana, nderado nda quem tjoye tojayana, “¡chentsana mojuaná y bëts uafjajónayoye motsëshbuetše ca!” y chca tojayana ainaniñe inÿetšá juabna ntjatsbomncá, y ainaniñe puerte tojtsošbuaché ntšamo tojayancá aíñe yochjochnënguama, ndegombre chca echanjochnëngo. ²⁴ Chíyeca cbochanjáuyana, lempe ntšamo Bëngbe Bëtsáftaca chašmojtsencuénta ora chašmojtsotjanañama, ainaniñe corente šmochtsejuabnaye ya šmojóyëngañe ca, y ndegombre chca šmochántsebomna. ²⁵ Y Bëngbe Bëtsáftaca chašmojtsencuénta ora, šmochjenójuaboye nderado nda ndaye bacna soye tšëngaftangbiamama tojamama, y cháftaca cabá etonánënga šmojtsemnëse, šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama. ²⁶ Pero inÿa ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaperdonaye ca —cha tojánayana.

Jesusbe obenana

(Mt 21.23-27; Lc 20.1-8)

²⁷ Chca tojanopasá chentsana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobeconá bachnangbe amëndayënga, ley abuátambayënga y chë judiëngbeñe bëtsëjemëngcá

amëndayënga, ²⁸ y mëntšá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšetá ca?

²⁹ As Jesús tojanéyana: —Atšnaca sëntsebomna canÿe soye tšëngaftanga jatjayama. Chašmojojuase, átšnaca cbochjáuyana ndaye deréchoca atše chca stsama. ³⁰ ¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga? Smëyana ca.

³¹ Chora chënga tmojanontšé mëntšá enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chë cha tcmojanabuayená soyënguiñe ndoñe šmonjanošbuaché ca?’ ³² Pero ndoñe quemuátobena jayanana ‘entsanga ca.’” Chca tmojánayana, er chënga entsangbiana imojánauatja, er nÿetscanga imojanjuabná, Juan ndegombre Bëngbe Bëtsabe juabna oyebuambnayá yojamnama. ³³ Chcasna, chënga tmojanjuá: —Bënga ndoñe queftsátstatšëmbo ca.

Y Jesús tojanéyana: —As atše cach ndoñe quebochatéyana ndaye deréchoca atše chca stsama ca.

12

Chë puerte bacna trabájayëngbiana cuento (Mt 21.33-46; Lc 20.9-19)

¹ Chora Jesús tojanontšé cuentëngaca jabuátambana. Mëntšá tojanéyana: “Canÿe entsá bëtscá uvas betiyënga yojáje, y chë shëconana yojajétja. Chë uvasëšangá juantšëtetjamna canÿe base luare yojajutjo; y canÿe tsbanana jebna soye yojapórma chiñe jtsashanÿama. Chentšana, inÿe

trabájayënga chë jajañe yojúyentsame, y chana inye luaroye yojtsoñe. ² Chë uvasësangá juashacama tempo yojbuache orna, chë jajañe nduiño canye oservená ibojíchmua chë arréndayënga jáuyanama ntsachetsá chë nduiño ibojtsotocánama. ³ Pero chëngna, cha imojishache, imojtsejantsetaye, y tondaye ntajatacá imojtichmuá. ⁴ Chentsana, chë nduiño inye oservená ibojíchmua; pero chana, bestsaše imojtselísia y podesca imojtsóyenguango. ⁵ Chentsana inya ibojatichmuá, y chana chë arréndayënga imojtsóba. Y bángnaca yojichamuá; pero chëngna, ínÿengna imojtsajantsetaye y ínÿengna imojtsëbaye.

⁶ “Chë nduiño cabá canya ibojtsábojamna jíchmuama: cachabe bonshana uaquiñá. Cabana, cha ibojíchmua y mëntsá yojtsejuabnaye: ‘Atsbe uaquiñá cocayé mochanjóyeunaye ca.’ ⁷ Pero chë arréndayënga cha imojinÿe ora, imojeniyana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga, y lempe chabe otocana soyënga bëngbiama echanjoquéda ca.’ ⁸ Chcasna, cha imojishache, imojtsóba y chë uvas betiyënga jajañentsana más chcoye imojetsëtšena ca” —Jesús tojancuentá.

⁹ Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjetsëbaye, y inye trabájayënga chë uvas betiyënga jajañe echanjárrendaye.

¹⁰ “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntsá en-

dayana:

Chë yebna jebuanënga tmojtsanaboté ndëtsbé,
mora chë más bëts uashacuanësentşe entsejájona.

¹¹ Chë soye Bëngbe Utabná, Bëngbe Bëtsá chca
tojama, y bënga chama ojanánënga
fsëntsemna ca.”

¹² Chora, chë bachnangbe amëndayënga y chë
bëtsëjemëngcá mándayënga tmojánbošena Jesús
jishachana, er chënga tmojanenótatsëmbona cha
chca tojancuentá jinÿanÿiyama chënga mo chë
puerte bacna trabajayëngcá imojanmënama.
Pero entsangbiama imojtsauatja, chíyeca cachcá
tmojanonÿá y chentšana imojtsóñenga.

*Chë Romoca bëts mandadbiama impuesto jtsat-
squëcjnyama*

(Mt 22.15-22; Lc 20.20-26)

¹³ Chentšana chënga, básefta fariseunga y
Heródesbe ústonënga Jesúsbioye tmojanichamó,
ndayá cha tojayaniñe jisháchichiyama, as chca
jtsebomnama ndaye sóyeca mandadëngbeñe
cha mal jaquédana. ¹⁴ Chënga tmojána y Jesús
tmojanianyana: —Buatëmbayá, bënga fsëndëtatšëmbo
aca ndegombre soyënga cnetsabuátambama,
y ndoñe jatuenanana nÿe ntšamo entsanga
tmojatichamcá, er achiamo tondaye quenatámana
nda más uamaná o nduamaná tomnana;
y contsabuátambá ndegombre tšabe vida
jtsebomnama, ntšamo Bëngbe Bëtsá yomandacá.
Chcasna, ¿tšabá tanántsemana, César, chë
Romoca bëts mandadbiama bënga impuesto
jtsatsquëcjnyana? ¿Fchtsatsquëcjnyaye o ndoñe
ca? —chënga tmojantjá.

15 Jesús yojtsetátšëmbo, chënga bacna entsanga ntšamo ndegombre tmojuabnacá ndinÿinÿnayënga imojamnama; chíyeca tojanëyana: —¿Ndáyeca tšëngaftanga šmojtseboše chë sóyeca atše jisháchichiyama? Canÿe denario crocénana šmiyëboñe, atše chayobená jinÿama ca.

16 As canÿe crocénana tmojanoyé y Jesús tojanëyana: —¿Ndabe jubiá quem crocenaniñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

17 Chora Jesús tojanëyana: —Chcasna, César šmochtoyiye cha ibotocana soye; y Bëngbe Bëtsana cha ibotocana soye ca.

Y nÿetscanga chama imojenjaná.

Obanënga jtayenama Jesús tmojantjá

(Mt 22.23-33; Lc 20.27-40)

18 Chentšana, báseftanga saduceo ca uabaina entsanga tmojána Jesús jinÿama. Chënga imojanjuabná obanënga ndocna te ntayenana ca. Chíyeca, Jesús mëntšá tmojaniyana:

19 —Buatëmbayá, Moisés tojëftsanabema, nderado canÿe boyá tojóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chabe uabochená obanabiamá básenga jtsabamnama ca. 20 Y chcase, canÿe, canÿsëfta catšátanga monjamna. Chë natsaná tonjanobouamá y tontsanóbana básenga ntjëftsabashejuancá.

21 Chentšana, chë ústona uabentsá chë shémaftaca tonjanobouamá, pero chana tontsanóbana,

básenga ntjéftsabashejuancá; chë inÿe uabentsáftaca cachcá tonjanopasá. ²² Chca, nÿetsca canÿsëfta catšátangaftaca cha tonjanobouamá, pero ndocná básenga ntjéftsabáshejuanana. Y chentšana chë shembásanaca tontsanóbana. ²³ Y morna, chë obanënga chamojtayena ora, ¿ndabe chë canÿsëfta catšatanguentšabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

²⁴ As Jesús tojanëyana: —Ntšamo Bëngbe Bëtsabe uabemana palabrënguiñe endayancá ndoñe tcmojosertá, ni Bëngbe Bëtsabe obenanama. Chíyeca ntšamo ndoñe yondmëncá šmotsichamo. ²⁵ Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëngcá. ²⁶ Y chë obanënga jtayenama, ¿Moisesbe librëšañe ndoñe šmëndualía ntšamo Bëngbe Bëtsá tbojaniyanama, chë betiyetema yojtšángbototjuana ora? Bëngbe Bëtsá mëntšá tbojaniyana: “Atše sëndmëna Abraham, Isaac y Jacobëbe Bëtsá ca.” ²⁷ Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entšangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga canÿe ndoñe ndegombre soyiñe šmontsemna ca —tojanëyana.

*Chë más bëts uámana mando
(Mt 22.34-40)*

²⁸ Chentše yojtsemna canÿe ley abuatambayá. Cha yojouena ntšamo Jesús y chënga imojtse-natsëtsnayana, y yojtsetátšëmbo Jesús tšabá to-

janějuama. As, tojanobeconá y Jesúsbioye tbojan-tjá: —¿Ndayá chë más bëts uámana mando yomna ca?

²⁹ Y Jesús tbojanjuá: —Chë más uámana mando mëntšá endmëna: “Israeloquënga šmochjouena, Utabná, Bëngbe Bëtsá endmëna, y nÿe canÿe Bëngbe Utabná endmëna, ndocná más. ³⁰ Utabná Bëngbe Bëtsá cochtsebobonshana nÿets acbe ainánaca, nÿets espíritoca, nÿets juábnaca y nÿets añémoca.”

³¹ Y chentšana quem inÿe mándnaca: “Ndëmua entšánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

³² Chora, chë ley abuatambayá Jesúsbioye tbojaniana: —Buatëmbayá, puerte tšabá tcjayana. Ndegombre yomncá contsichamo, nÿe canÿe Utabná endmëna y ndocná más. ³³ Y cha jtsebobonshánana nÿets ainánaca, juábnaca y añémoca, y ndëmua entšánaca jtsebobonshánana cachá cuenobobonshancá, puerte cuámana. Cach nÿetsá ndoñe quenatámana bayënga jtsëbánayana, ni chë uátšëmbona soyënga Bëngbe Bëtsá jëtschuayama ca.

³⁴ Cha nÿets juábnaca tbojanjuama Jesús tojáninÿe ora, tbojaniana: —Batsatema cmontsebuáshbena jtseprontánama, Bëngbe Bëtsá chacolesenciamama acbe ainanentše jtsemándayama ca.

Y chentšana, ya ndocná yonjenñëmua Jesús más jatstjanayama.

*¿Cristo ndabe entšábentšana yomna?
(Mt 22.41-46; Lc 20.41-44)*

³⁵ Jesús Bëngbe Bëtsabe bëts yebnentše vojtsabuátambaye ora, tojánayana: “¿Ndáyeca chë ley abuátambayënga mondbëtsichamo chë Uámana Uabuayaná Davídbentšana iuabó ca? ³⁶ Cach David, chë Uámana Espíritbe mándoca mëntšá tojánayana:

Bëngbe Bëtsá, atšbe Utabná Crístbioye tbonjaniyana:

atšbe catšbioica mótbema,
atšbe obenánaca, acbe uayayënga acbe cucuatšíñe
chamoquedama chjamëntscuana ca.

³⁷ ¿Ntšámose Cristo Davídbentšana Entšá nántsemna, cach David ‘Utabná ca’ chábioye tbojtsabobuátmëse ca?” —cha tojanéyana.

Y chë bëtscá entšanga, oyejuayënga imojtsue-nana.

*Jesús chë ley abuátambayëngbiana tojánayana,
chënga ndoñe tšabá montsama ca*

(Mt 23.1-36; Lc 11.37-54; 20.45-47)

³⁸ Mëntšánaca Jesús chënga vojtsabuátambaye: “Cuedado šmochtsebmna y ndoñe šmattsama chë ley abuatambayëngcá. Chënga jtsogusetánana bënëna entšayangaca jtsajnana y jtsebošana tsáshenañe entšanga nýa respétoca chamot-sacheuanama.

³⁹ Chë judiëngbe enefjuana yebnënguenache, chë más uámana luarënguñe jtsetbiámanana, y chë fiestënguenache nýa quëfseroca.

⁴⁰ Pero chënga, viudángbioye chë tmobomna soyënga jtsabacayana, y entšangbe delante tšabá chamotsënyama, y chëngbioye imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuéntayana. Chë

causa, Bëngbe Bëtsá ínyëngbiana más chënga echanjácastigaye ca” —Jesús tojánayana.

*Jesús yojtsënyaye chë crocénana quëcjnyënga
(Lc 21.1-4)*

⁴¹ Jesús jabuátambama tojanpochocá ora, tojanótbema Bëngbe Bëtsabe bëts yebnentše, chë crocénana quëcjnyëtema ndirichiñe; y chë crocénana quëcjnyënga yojtsënyaye. Bëtsá bomnëngna becá crocénana imojtsequëcjnyaye.

⁴² Chora, canye viudá ndbomnjëmnaca yojobeconá y nye uta crocénana chëtëmiñe yojaftseseGORÁ.

⁴³ Chora Jesús chabe uatsjëndayënga tojánachembo chamobëconama, y mëntšá tojanëyana: “Ndegombre cbëyana, quem viudá ndbomnjëjema, Bëngbe Bëtsabiana nyetscangbiana más tonjëftseseGORÁ.

⁴⁴ Chë bomnëngna chë yojtsóyentsjamentšana tmonjëftseseGORÁ, y cabá bomnana imotsóbmñe; y chë viudana tonjëftseseGORÁ lempe ntsachetšá yobomncá; masque tša ndbomnjëjema, chë vida jtsebomnama lempe ntsachetšá yobomncá tonjëftseseGORÁ ca.”

13

Jesús tojánayana chë Bëngbe Bëtsabe bëts yebna lempe mochjápochocama

(Mt 24.1-2; Lc 21.5-6)

¹ Jesús Bëngbe Bëtsabe bëts yebnentšana tojëftsanbocna ora, canye chabe uatsjëndayá tbojanayana: —Buatëmbayá, minye, itša bëts ndëtsbenga, y tša botamana bëts yebnënga ca!

² Chora Jesús tbojanियana: –Tšabá cochjinÿe tša botamana bĕts yebnĕnga. Pero muentše ndoñe queochaisoquéda ni mo canÿe ndĕtšbé inÿebé juatsboye. Lempe mochantsepochóca ca.

Ntšamo yochtsemna quem luare jopochócama te chaojtsobeco ora

(Mt 24.3-28; Lc 21.7-24; 17.22-24)

³ Chentšana, Olivos tjashoye chĕnga tmojána. Bĕngbe Bĕtsabe bĕts yebnentša ndirichiñe yojamna; y Jesús tojanótbema ora, Pedro, Santiago, Juan y Andrés iytĕcana tmojantjá, ⁴ ntšamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšĕmbuama, ndayá Bĕngbe Bĕtsá yochjanma ca.

⁵ Chora Jesús tojanĕjua: “Cuedado šmochtsebomna ndocná chacmondáingñema.

⁶ Banga mochanjabo y mochantšabíchamo chĕnga Jesús imomna ca. Mochántšichamo: ‘Atše chĕ Cristo sĕndmĕna ca’, y chca, ba entšanga mochanjáingñaye.

⁷ “Entšanga tmojtsentsjanama y nderado mochjentsjámnaca tšĕngaftanga chašmojouena ora, ndoñe šmattsauatja; er chca chaochnĕnguama entsemna, pero masque chca, chora chĕ quem luare jopochócama tempo cabá ndoñe queochátsmĕna. ⁸ Canÿe luarentša entšanga inÿe luaroca entšángaftaca mochántšentsjanaye, y canÿe amĕndayábentša entšanga inÿe amĕndayábioca entšangaftácnaca; ba luarĕnguenache fshantse echanjuangmĕmana y bĕts shĕntsana

echanjóshjango. Masque chca jasúfriase, más chcoye cabá más mochanjatssúfria.

⁹ “Pero tšëngaftangna cach tšëngaftangbiana smochtsantješna; entšanga cmochanjíshêche y amëndayëngbe cucuatšîñe cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bétsemna causa, mandadëngbioye y reyëngbioye cmochanjunatse, choca, chëngbe delante ntšamo atšbiana šmotatšëmbcá chašmuayanama.

¹⁰ Er entseyta, quem luare cabá ndopochóca ora, Bëngbe Bëtsabe tšabe noticiënga nyetsca luarënguentša entšángbioye chaóshjanguama.

¹¹ Y ínÿengbe cucuatšîñe jabáshejuanama chacmojtsënachá ora, ndoñe šmattsenócochinÿena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cánÿenga ndoñe chora quešmochátoyebuambnaye, ndayá chë Uámana Espíritu tšëngaftangbiajana echantsóyebuambnaye.

¹² “Canÿe catšata cachabe catšata ínÿengbe cucuatšîñe bochanjáboshjona chamotsóbama, y bëtsëtsanga cachëngbe básenga mochanjábashhejuana chamotsëbáyama; y chë básengna chëngbe bëtsëtsangbe contra mochántsemna y chamotsëbáyama mochanjábashhejuana.

¹³ Atšbe ústonënga bétsemna causa, nyetsca luarënguentša entšanga cmochantsëbuayënja; pero nda nyets tempo átšbeñe ošbuachiyá totsomñe, atsbocaná echántsemna.

14 “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojéftsanabema. Chë puerte uabouana soye, chca jtsemnama ínÿoca tšëngaftanga chašmojinÿe ora (nda tojtsalía, chabosertá), šmochántsetatsšëmbo chë puerte ngménana tempo tojóshjanguama; chorna, chë Judeoca chamojtsemna entšanga, batsjabengoye chamotsacheta; 15 chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama; 16 y nda jajoca chaojtsemna, yebnoye ndoñe chaondéta ni mo chabe quëfsaiya jesácñama. 17 ¡Tša lastema chë tempo ngomámanënga o ochóchaye šesonga chamojtsabamna shembásengbiamá! 18 Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora, 19 er chora puerte ngmenancá echántsemna. Tša jabuache ngmenancá, quem luare jobojátšama orscana y mëntscoñama y más chcoye, cachcá ngménana ndoñe ntjamnana. 20 Chë puerte ngménana tempo, yapa bën ndoñe chaondétsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanÿeshanayeca, echanjama yapa bën tempo ndoñe chaondétsemnama.

21 “Chora nderado nda chacmojáuyana: ‘Minÿe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. 22 Er mochanjábocana ndoñe

ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanÿiyama, entšanga jáingñama, y tmojobenase, chë Bëngbe Bëtsabe bocacánëngnaca.
²³ ¡Cuedado šmochtsebomna! Cabá chca ndochnëngo ora, lempe tcbonjabuayená ca” — Jesús tojanëyana.

Bëngbe Bëtsá Entšá tbojanbemá quem luaroye echanjësabo

(Mt 24.29-44; Lc 21.25-36)

²⁴ Mëntšánaca Jesús tojanëyana: “Pero chë tempo, entšanga puerta chamojasufrí chentšana, shinÿe ndoñe queochátsbuashinÿinÿana, juashcona ndoñe queochátsbinÿnaye, ²⁵ celocana estrellënga echanjatquëcjana, y quem luarentša tsbanánoca espíritënga obenana bomnënga echanjángmëmana. ²⁶ Y chora, entšanga mochanjinÿe, Bëngbe Bëtsá Entšá tbojanbemá jantšetëshiñe echántsaboye, corente obenánaca y corente buashinÿinÿaniñe. ²⁷ Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nyëts luarëngocana, quem fshantsoca cánÿoica juachoicana, celoca ínÿoica juachóntscoñe.

²⁸ “Chë higo betiyama šmochjuatsjinÿe: Tsëm buacuafjënga tojtsebomna ora y tojtsaisëjotsana, jtsotatsëmbuana chë tšabe tempo ya tojtsaisobecuama. ²⁹ Cachcá, chë soyënga ndayama tšëngaftanga tcbonjauyancá chašmojinÿe ora, šmochántsetatsëmbo Bëngbe Bëtsá Entšá tbojanbemá ya jésabama

yajtsemnama. ³⁰ Ndegombre cběyana, lempe chca echanjochnēngo, morsca entšanga cabá ndóbana ora. ³¹ Celoca y quem luare echanjopochóca, pero atšbe palabra ndocna te queochaisopochóca.

³² “Pero Bēngbe Bětsá Entšá tbojanbemá ndayté y ntseco ora yochjésabama, ndocná quenátstatsēmo, ni chē celoca angelēnga, ni Bēngbe Bětsabe Uaquiñá. Nye chē Taitá chama yotátšēmo.

³³ “Chíyeca, cuedado šmochtsebomna y yejuana šmochtsantješna, er ndoñe quešmátstatsēmo mocna ora yochtsemna Bēngbe Bětsá Entšá tbojanbemá jésabama tempo. ³⁴ Echántsemna mo canye entšacá; chana inye luaroye ya jěftsebocnama ora, chabe oservēnga jěftsamēndana chabe yebna chamotsinýenama. Cada ona canye trabajo jěftsebónyiyana, y chē shanyá jěftsemándana botamana chaotsantješnama. ³⁵ Chcasna, cuedado šmochtsebomna, šmochtsantješna, er ntšamo chē trabajayēngcá chē yebna nduiño ntseco jtashjanguama, ndoñe ntsetatšēmbuana, mo nderado jétatana, tsěntseto ora, bínyanoye o cachēse, tšēngaftanga cachcá, Bēngbe Bětsá Entšá tbojanbemá ntseco jésabama ndoñe quešmátstatsēmo; ³⁶ ndoñe cuedado šmontsebomněse, nderado cha nye ndeolpe nántashjango, tšēngaftanga ndēprontánēnga šmojtsemna ora, mo ftsomañe cuenta. ³⁷ Chíyeca, ntšamo tšēngaftanga cbochanjauyancá, nyetscanga chanjáuyana: ¡Puerte cuedado šmochtsebomna ca!” —Jesús tojánayana.

14

Entšanga imojtsejuabnaye ntšamo jamëse Jesús jishachama

(Mt 26.1-5; Lc 22.1-2; Jn 11.45-53)

¹ Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse sayora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseíngñase, y jtsóbama. ² Báseftanga imojtsichamo: “Quem fiestëntscuana ndoñe, er nderado entšanga yapa muanjóntša enbouenanana ca.”

Canÿe shembása botamana uanguëtse béjaye Jesusbe bestšašiñe tbojanbuešcja

(Mt 26.6-13; Jn 12.1-8)

³ Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canÿe shembása tojánashjango. Chë shembása yojúshjango canÿe alabastro jarrëtema jútjena canÿe becá uámana y botamana uanguëtse béjayeca, ena nardana uanguëtšiye; chana chë jarrëtema yojátsba y chë béjaye Jesusbe bestšašiñe tbojanbuešcja. ⁴ Chca tmojáninÿe ora, báseftanga chentše imojtsemnënga tmojanotjayaná y mëntšá imojtsenatsëtsnaye: —¿Ndáyeca nÿe bonamente chë soye yojtsemna ca? ⁵ Chamna, matmënjobenanga chë béjaye unga patse denario crocenánama juiyana, y chánaca ndbomnjémënga matmënjújabuache ca.

Y chë shembásabiama podesca imojtsichamo.

⁶ Chora Jesús tojanéyana: —¿Ndáyeca quem shembása ndoñe cachcá šmochanjonÿaye ca? ¡Ndocá matatsana! Atšbiamá tšabe soye tonjama. ⁷ Er ndbomñëjémënga nÿets tempo tšëngaftangbeñe mochanjëftsemna, ndayténaca šmojábošena ora, šmatjobenaye tšabe soye chëngbiamá jamana; er atše tšëngaftangaftaca ndoñe nÿets tempo quichásemna. ⁸ Quem shembása lempe ntšamo tojobenacá atšbiamá tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná sëntsemna ora. ⁹ Ndegombre cbéyana, quem luaroca ndayéntšnaca Bëngbe Bëtsabe tšabe noticiënga chamojtsabuayiyiná chentše, ntšamo quem shembása tojamámnaca becá mochanjëftsóyebuambaye, chca, entšanga chabiamá chamotsenójuabnama ca —cha tojanéyana.

Judas tojána bachnangbe amëndayëngbioye, Jesús chamuishachama

(Mt 26.14-16; Lc 22.3-6)

¹⁰ Chentšana, Judas Iscariote, canÿe chë bnëtsana uta uatsjendayënguentsá, tojána chë bachnangbe amëndayëngaftaca jencuéntama, Jesús chëngbe cucuatšiñe jaboshjonama. ¹¹ Chca tmojanuena ora, chënga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšiñe jaboshjonana.

Jesús chabe uatsjédayëngaftaca Bashco saná tojanse

(Mt 26.17-29; Lc 22.7-23; Jn 13.21-30; 1 Co 11.23-26)

¹² Chë Bashco fiesta bojatšenté, chë levadúraca ndëpormana tandëse sayté, chë uatsjédayënga Jesús tojantjá: —¿Ndémoca cojtseboše bënga fchaiprontama, Bashco saná chacosama ca?

Chca te chë judiënga imojanamana, Bëngbe Bëtsá jëtschuayamna canÿe oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

¹³ As Jesús uta chabe uatsjédayata tojanichamó y mëntsá tojanëyana: —Chë bëts puebløye motsata. Chašojáshjango ora, canÿe bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndëmuanÿe yebnentše yochjámarshënguama; ¹⁴ y chë yebna nduiño šochjauyana: “Buatëmbayá tonjayana: ¿Ndayentše chë tsañe yojtsemna, Bashco saná atše atšbe uatsjédayëngaftaca jasama ca?” ¹⁵ As cha cmochanjínÿanÿiye canÿe bëts tsañe, tsbanana pisoca, lempe prontániñe; chentše šochjaprónta bënga mochjasama ca.

¹⁶ As chë uatsjédayata tbojána y tbojáninÿena lempe ntšamo Jesús tojanëyancá; y chentše chë Bashco saná tbojanprontata.

¹⁷ Tojanibétata ora, Jesús chë yebnoca tojánashjango, chabe bnëtsana uta uatsjédayëngaftaca. ¹⁸ Y mesëshentše imojtsesaye ora, Jesús tojanëyana: —Ndegombre cbëyana,

canÿa tšëngaftanguentsá, átšeftaca entsesá cha, uayayëngbe cucuatšične šochanjáboshjona ca.

¹⁹ Chorna chë uatsjédayënga ngménaca imojtsemna, y tmojanontšé canÿánÿa cha jatjayana: — ¿Atše chtsemna ca?

²⁰ Y Jesús tojanějua: —Canÿa chë bnëtsana utatentsá entsemna. Chabe tandëše cach atše sëntsefchecuacná šcnenentše cha entsefchecuacná.

²¹ Ndegombre, Bëngbe Bëtsá Entšá tbojanbemáftaca echanjopása ntšamo chabiamá Bëngbe Bëtsabe uabemana palabrenguiñe endayancá. Pero, itša lastema chë bochjáboshjonabiamá! Chabiamá más tšabá manjamna ndoñe ntjónÿnana ca —Jesús tojánayana.

²² Imojtsesantscuana, tandëše tojanca, Bëngbe Bëtsábioye chama tbojtanchuá, tojanjataye y chabe uatsjédayënga tojanëjatá, y mëntsá tojánayana: “Mocñënga, mosënga, atšbe cuerpo entsemna ca.”

²³ Chentšana, canÿe coptema vínoyeca tojanaca, Bëngbe Bëtsábioye tbojtanchuá, chabe uatsjédayënga tojanëfsašé, y nyetscanga tmojanofšé.

²⁴ Mëntsá tojánayana: “Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojašebuachenacá ndegombre yochjochnënguama. Chë buiñe bëtscá entsangbe tšabiamá echanjuábuashana.

²⁵ Y ndegombre cbëyana, morscana ya ndoñe más chë uvasësentšana obocniye quichaisofšiyë. Chë tsëm vínoye tšëngaftangaftaca chanjofšiyë, Bëngbe Bëtsabe amëndayoca chamojtsemna ora ca” — tojánayana.

Jesús tojánayana, chábioye ndoñe bonjanabuátma ca Pedro yochjánayanama

(Mt 26.30-35; Lc 22.31-34; Jn 13.36-38)

²⁶ Bëngbe Bëtsábioye jëtschuayama tmojancantá chentšana, Olivos tjashoye tmojëftsanbocana.

²⁷ Jesús tojanéyana: —Njëtsca tšëngaftanga quem ibeta átsbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrenguiñe, cha mëntšá tojánayana: “Chë oveshënga abujénya chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora.

²⁸ Pero obanënguentšana chaitayenentšana, tšëngaftangbe natsana Galileoye chanjá ca —cha tojanéyana.

²⁹ Chora Pedro tbojaniyana: —Masque njëtscanga ácbeñe ošbuáchiyana chamotsobuetše y chamotsacheta, atše nya ndocna te ca.

³⁰ Chora Jesús tbojaniyana: —Ndegombre cbëyana, cam ibeta, ngallo cabá uta soye ndécánta ora, aca unga soye cochanjayana ndoñe šconduabuatma ca.

³¹ Pero Pedro más yojtsichamo: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y njëtscanga cachcá imojtsichamo.

Getsemaní luarentše Jesús, Bëngbe Bëtsáftaca tbojanencuentá

(Mt 26.36-46; Lc 22.39-46)

³² Chentšana, canye luare Getsemaní ca uabáinoye tmojána. Chocna Jesús tojanéyana:

“Muentše motbiamá, chēntscuana atše choye chanjá, Bēngbe Bētsáftaca jencuéntama ca.”

³³ Y tojēftsanēbiatše Pedro, Santiago y Juan. Choca cha yojóntša puerte ngménaca jtsemnama y corente cochtsetšenaná. ³⁴ Chēngbioye tojanéyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

³⁵ Chentšana, Jesús más natsanoye tojána, tojanoshēntsamentšé y fshantsóntscoca tojanotsejbéna y Bēngbe Bētsábioye tbojanimpadá, jopódianēse, chē tša japadésa ora ndoñe chaondóshjanguama. ³⁶ Mēntšá yojtsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondētsemnama. Pero ntšamo atše stsebošcá ndoñe chaondētsemna, sinó ntšamo aca cojtsebošcá ca.”

³⁷ Chentšana, chabe unga uatsjéndayēngbioye tojtanabo, y chēngna imnétsomañe. Chca tojánanyēna ora, Pédrēbioye tbojaniyana: “Simón, ¿cotsomañe? ¿Ni mo nye canye hora jtsefšnama ndoñe tconjobená? ³⁸ Smochtsefšna y Bēngbe Bētsáftaca šmochtsencuéntaye, bacna soye jamama ndoñe chacmondócochēnguama. Tšēngaftanga ndegombre šmontseboše espíritoca Bēngbe Bētsá joyeunayana, pero cuerpiñe ndoñe añemo quešmátsbomna ca.”

³⁹ Jesús cachiñe tojesaná y Bēngbe Bētsáftaca tbojanencuentá, cach palabrenga jayanēse. ⁴⁰ Yojtabo orna, chē uatsjéndayēnga cachiñe imnétsomañe; chēnga imojtsefshétana ocnaye causa, y ndoñe imontsobena ntšamo jojuana.

⁴¹ Chentšana, tojtesaná y tojtanabo ora tojaněyana: “¿Cabá šmotsomañe y šmotsochnañe? Nye nyetsá; hora tocjobuache, Běngbe Bětsá Entśá tbojanbemá bacna soye aměngbe cucuatšiñe mochanjáboshjona. ⁴² Motsbananga, cuajna. Minyěnga, atše boshjuaná ya entsebeconá ca.”

Uayayěnga Jesús tmojánishache
(Mt 26.47-56; Lc 22.47-53; Jn 18.2-11)

⁴³ Jesús cabá yojtsóyebuambnantscuana, Judas, canye chě bnětsana uta uatsjendayěnguentśá, tojánashjango y cháftaca ba entśanga espadějangaca y ngarotbėngaca prontáněnga. Chěnga imojamna chě bachnangbe aměndayěnga, ley abuátambayěnga y judiěngbeñe bětsějeměngcá mándayěngbe ichmóněnga. ⁴⁴ Judas, chě boshjuaná, tojanjuabó ntšamo jamana entśanga jinyanjyama nděmua Jesús bětsemnana. Chíyeca, yojáuyana: “Nda chajjauámocho, cha echántsemna; šmochjishache y cuedádoca šmochjuánatse ca.” ⁴⁵ Chcasna, Judas Jesúsbioye tojanobeconá y tbojanianyana: “¡Buatěmbayá ca!”

Y tbojanámocho. ⁴⁶ Chora chě entśanga tmojánishache y tmojanánatse.

⁴⁷ Pero canya chentše Jesúseftaca yojtsemná, chabe espaděja yojenosěngbotěntšena, y chě bachnangbe más uámana aměndayabe oservená canye matscuashe tbojtsaněstjango.

⁴⁸ Y Jesús chě entśanga tojanatjá: “¿Ndáyeca šmojabo espadějangaca y ngarotbėngaca atše jishachama, mo atše canye bacá uamana entśá cuaftsemncá ca? ⁴⁹ Atše cada te tšěngaftangbeñe sěndětsemna Běngbe Bětsabe běts yebnocá

abuátambaye, y ndocna te choca chešmánishache. Pero tšëngaftanga chca átšeftaca šmotsama, cachcá ntšamo Bëngbe Bëtsabe uabemana palabrënguiñe endayancá chaotsemnama ca” —tojánayana.

⁵⁰ Chorna, nyetsca uatsjëndayënga tmojt-sanëuatjaná y tmojtsanacheta, y Jesús cachcá chë uayayëngaftaca tmojesanonýá. ⁵¹ Canýe bobontse Jesúsbioye ibojtsëstona, nye canýe uafjantse entsëjua uichëtjoná. Cha chë entsanga tmojánishache, ⁵² pero chëngbe cucuatšifne chë entsëjua jesáboshjonëse, chë bobontsna enašá yojtsachá.

Jesús tmojanánatse chë judiëngbe uámana amëndayëngbioye

(Mt 26.57-68; Lc 22.54-55, 63-71; Jn 18.12-14, 19-24)

⁵³ Chentšana, Jesús tmojanánatse chë bachnangbe más uámana amëndayábioye; y chocna, nyetsca chë bachnangbe amëndayënga, bëtsëjemëngcá amëndayënga y ley abuátambayënga tmojánenefjna. ⁵⁴ Pedro bënocana Jesús tbojanasto, chë bachnangbe más uámana amëndayabe yebnentša chashjóntscoñe; y chentše tojanoquedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtsešbonena.

⁵⁵ Chë bachnangbe amëndayënga y chë judiëngbe uámana mándayënga imojtsenguaye canýa, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninýana. ⁵⁶ Er masque banga

Jesusbe contra uayátsenaye soyënga imojtsichamo, nyetscanga ndoñe cachca soye montsanichamo.

⁵⁷ Báseftanga imojotsaye y mëntšá Jesusbe contra, ndoñe ndegombre betsemncá tmojánayana: ⁵⁸ “Bënga cha fsënjoyeuná mëntšá: ‘Atše quem Bëngbe Bëtsabe bëts yebna, entsangbe pormana yebna, chantsepochóca; y unga tese inye Bëngbe Bëtsabe bëts yebna, entsángbeyeca ndëpormana yebna chanjëtsjebo ca.’ ”

⁵⁹ Pero masque chca imojtsichamo, nyetscanga ndoñe cachca soye montsanichamo.

⁶⁰ Chorna, chë bachnangbe más uámana amëndayá yojotsbaná, nyetscangbe tsëntsaca yojotsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

⁶¹ Pero cha nye iytëca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntšá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

⁶² Y Jesús tbojanjuá: —Arseñor, atše cha sëndmëna; y tšëngaftanga šmochanjinye, atše, Bëngbe Bëtsá Entšá tbojanbemá, chë nyets obenana bomnabe catsbioica chantsetbemana, y celoca jantsetëshiñe chántsaboye ca.

⁶³ Chora, chë bachnangbe más uámana amëndayá chabe uichëtjonëjuangá yojt-senántšajatanëca, puerte ibojtsetna causa, y tojánayana: —¿Ndayama más entsanga šochjátëjabeto Jesusbe contra chamuayanama ca? ⁶⁴ Tšëngaftanga šmonjouena ntšamo chë entšá

entsichamcá, y chca Bëngbe Bëtsabiana entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tšëngaftanga šmatjayana ca? —cha tojanëyana.

Y nÿetscanga tmojánayana, cha ndegombre bacna soye yojtsebmna y jóbanama ibojtsemna ca.

⁶⁵ Chorna báseftanga tmojanontsé Jesús buashëtjnayana; jubiá imojútsbotse, imojtsetantsetaye y imojtsetjanaye: “¡Momalisiá nda tcmënjajantsetá ca!” Y chë Bëngbe Bëtsabe bëts yebnoca josticiëngna imojtsajuebiantsetaye.

Pedro tojánayana Jesúsbioye ndoñe bonjanabuátma ca

(Mt 26.69-75; Lc 22.56-62; Jn 18.15-18, 25-29)

⁶⁶ Pédrëna, tsmanoca yojtsemna chashjoca. Chora, canÿe shembása, chë bachnangbe más uámána amëndayabe oservená yojáshjango; ⁶⁷ y Pédrëbiyoe tbojáninÿe ora, cha iñe juachaca yojtsanšbonena, yejuana ibojonÿinÿiye y tbojaniana: —Acnaca, Jesús Nazaretocáftaca conjánana ca.

⁶⁸ Pero Pedro tojánayana chábioye ndoñe bonjanabuátma ca; y mëntšá tojánayana: —Ndayama cojtsichámuama ndoñe quetsátstatšëmbo, ni quešnátësertana ca.

Y shjoye, amashjuanóntscoñe yojábocna; y chora canÿe ngallo yojacánta. ⁶⁹ Chë oservená cachiñe Pédrëbiyoe tbojáninÿe y tojanontsé chë ínÿenga jauyanana: —Muánaca Jesusbe uatsjendayënguentšá entsemna ca.

⁷⁰ Pero chana cachiñe tojánayana Jesúsbiyoe ndoñe bonjanabuátma ca. Chentšana, chë

chentše imojtsemnënga Pedro tmojátaniyana: — Ndegombre aca chënguentsá contsemna; ácnaca Galileocá contsemna ca.

⁷¹ Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stsichámëse ca! —y yojóntša júrayana — ¡Atše chë entsá ndoñe quetsatabuatma, ndabiamatšëngaftanga šmontsatsësná ca!

⁷² Y cachora chë ngallo uta soyama yojacánta, y Pedro yojenójuaboye ntšamo Jesús tbojaniyanama: “Ngallo cabá uta soye ndëcánta ora, aca unga soye cochanjayana ndoñe šconduabuatma ca.” Y tojanontsé enóbošachiyana.

15

Jesús Pilátbioye tmojanánatse

(Mt 27.1-2, 11-14; Lc 23.1-5; Jn 18.28-38)

¹ Tojanbinýna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuatambayënga cánýentše tmojánenefjna, nyetsca chë luarentša más uámána mandayëngaftaca, jenóyeunayama ntšamo jamëse Jesús jóbama. Jesús tmojanëcuébatseca y tmojanánatse, y Pilato, chë Judeoca mandadbe cucuatšiñe tmojánboshjona.

² Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

³ Chë bachnangbe amëndayënga bëtscá soyënga Jesusbe contra imojtsichamo; ⁴ chíyeca Pilato cachiñe Jesúsbioye tbojantjá: —¿Ndocá

šochanjojuá ca? Minÿe; bëtscá soyënga acbe contra montsichamo ca.

⁵ Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

*Jesús chaóbana ca tmojánayana
(Mt 27.15-31; Lc 23.13-25; Jn 18.38-19.16)*

⁶ Cada Bashco fiesta ora, Pilato yojanamana canÿe utamená jëtsboshjonana, ndánaca entšanga tmojuabuayaná. ⁷ Chë tempo yojamna canÿa Barrabás ca uabainá; cárceloye inautámena chabe enutëngaftaca. Chëngna entšanga tmojtsanëbaye, mandadëngbe entšángaftaca imojentsjaná ora. ⁸ Chora, entšanga tmojánashjajna y tmojanontšé Pilátbioye jauyanana, ntšamo Bashco fiesta ora jamama yojanamancá chaomama. ⁹ Y Pilato tojanëjua: —¿Tšëngaftanga šmojtseboše tšëngaftangbe rey atše chjëtsboshjona ca?

¹⁰ Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšinë tmojáboshjonama.

¹¹ Pero chë bachnangbe amëndayëngna entšanga tmojanañemó chamuenbouénanama, Pilato jauyanama chëngbiana Barrabás chabuatsboshjona ca. ¹² Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

¹³ Y chënga tmojanáyebuachena: —¡Motsecrucificá ca!

¹⁴ Y Pilato entšanga tojanëyana: —¿Ndáyeca? ¿Ntšamo cha tojobuachjanguá ca?

Pero chëngna más añémoca tmojtëtanayebuachena: —¡Motsecrucificá ca!

15 As Pilato, entšángaftaca tšabá joquédama yojtsebóseyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentšana soldadëngbe cucuatšiñe tbojánboshjona, chamocrucificama.

16 Chentšana, chë soldadënga Jesús tmojanánatse chë mandadbe bëts yebnentša chashjoye, y nyetsca soldadënga tmojánachembo chamobéconama.

17 Shbuenda uafjatsenga uinýna entšayá mo reycá tmojanichëtjo; canýe coronëshu tmojanapormá uchmašëfjangaca y tmojanabestsajó. 18 Y chentšana tmojanontsé jachuayana: “¡Bayté judiëngbe Rey cochtsemna ca!”

19 Canýe niñëfjaca Jesús bestšašiñe imojtsëtsjanjnaye, imojtsebuashëtjnaye, y chabe delante imojtsofshëntsaméntšenaye. 20 Y chca imnaftsáboyejuanentsana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y pueblo chaboye tmojanánatse jacrucificama.

Jesús tmojancrucificá

(Mt 27.32-44; Lc 23.26-43; Jn 19.17-27)

21 Chora, canýe entšá chëjana yojtsatashjajuana, Simón ca uabainá, Cirene pueblócá, Alejandro y Rufbe taitá; jajocana yojtsatachnëjuana; y chë soldadëngna imojuatária Jesusbe cruz jëftsocutsayama.

22 Jesús tmojanánatse Gólgota ca uabaina luaroye (hebreo biyañe endayana “Obanabe Bestsashe Luare ca”); 23 y tmojanabuiyé vínoye mírraca enájuabniye, pero Jesús ndoñe yonjuáyëngacñe. 24 Y chentšana tmojancrucificá; y

chabe entšayangamna, tsbanánoye tmojaněšena jinŷama ndayá cada ona yochjěftsanácñama.

²⁵ Cachěse, base mošenana ora Jesús tmojan-crucificá. ²⁶ Y chabe bestšaše juatsboicna canŷe uabemana soye tmojananjo. Chiñe yojétsayana ndáyeca cha tmojancrucificama, měntšá: MUA CHĚ JUDIĚNGBE REY ENDMĚNA ca.

²⁷ Y cháftaca útata bacna soye ochjajnayátnaca tmojanacruzificá, canŷa chabe catšbioica, y ínŷana chabe uañicuayoica. ²⁸ Chca cháftaca tmojanma, chaochněnguama ntšamo Běngbe Bětsabe uabemana palabrěnguiñe chabiamá iuayancá, měntšá: “Y chábioye tmonjáninŷe mo chě puerte bacna soye aměnguentsá canŷa cuaftsemncá ca.”

²⁹ Y chějana imojtsachnějuana entšanga, Jesús imojtsóyenguaye, imojtsobestšfshanenaye y imojtsatsaye: “¡Aca chě Běngbe Bětsabe běts yebna cochtsánenasatajchca y nŷe unga tese cochtanjebó,
³⁰ cach aca mentsbocá y cruzocana matastjango ca!”

³¹ Cachcá chě bachnangbe aměndayěnga y chě ley abuatambayěnga imojtsáboyejuana, y chěnga imojtsenatsěsnaye: “Cha ínŷenga tojěftsatsebacá, pero cachá jěntsbocama ndoñe quenátobena. ³² ¡Chě Cristo, chě Israeloca Rey! ¡Cruzocana chauatastjango, běnga jinŷama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

Jesús tojanóbana

(Mt 27.45-56; Lc 23.44-49; Jn 19.28-30)

³³ Nÿetsto orscana y las tresëntscoñe, nÿets quem luare yojtseibétata. ³⁴ Chca orna, Jesús chabe biyañe tojanáyebuachena: “Eloi, Eloi, ¿lema sabac-tani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonÿá ca?”)

³⁵ Chca tmojanuena ora, báseftanga chentše imojtsemnënga imojtsichamo: “Mouenënga, chë Bëngbe Bëtsabe juabna oyebuambnayá Elías bontsechembuana ca.”

³⁶ As chora, canÿa tojanótjajo, untja vínoyeca canÿe esponjëshe tojanfchecuacúa, canÿe niñëfjiñe tojananguësëtjo y Jesúsbioye tojanbeconá chaofšema; y tojánayana: “Cachcá mochjonÿaye, er Elías tayochjabo jabátëstjanguama ca.”

³⁷ Pero Jesusna, jabuache tojanoyó y tojanóbana. ³⁸ Y chë Bëngbe Bëtsabe bëts yebnoca yojújonÿana entšëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaújonÿana. ³⁹ Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninÿe ora, tojánayana: “¿Ndegombre quem boyabása Bëngbe Bëtsabe Uaquiñá yomna ca!”

⁴⁰ Básefta shembásengnaca chentše imojtsemna, bënocana imojtserreparana; chënguentše imojtsemna María Magdalena; María, Santiago chë más basa y Josebe mamá; y Salomé. ⁴¹ Chë shembásengna Jesús tmojanasto y tmojanájabuache cha Galileoca yojamna ora; y inÿe ba shembásengnaca chentše imojtsemna, chë cháftaca Jerusalenoye tmojánanga.

Jesús tmojanatbontsá
(Mt 27.57-61; Lc 23.50-56; Jn 19.38-42)

⁴² Chë yëfsana ochnayté yojtsémnayeca, cach te yojánamna saná japróntana chë yëfsana jasama. Ya yojtseibétatana ora, ⁴³ Pilato yojtsemnoye tojána canye boyabása, José ca uabainá, Arimatea pueblocá; cha inamna canye chë luarentša uámana mandayënguentsá. Cha Bëngbe Bëtsábeñe yojtsošbuáchiye y yojanobátmana chabe amëndayana chaóshjanguama. Ndauatjca Pilátbioye Jesusbe cuerpo tbojanotjañe. ⁴⁴ Pilato yojenjnaná Jesús tša betesco yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tayojétsemnama. ⁴⁵ Chë soldadëngbe amëndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámbañama. ⁴⁶ Chora, José canye uafjantse lino entšëjua tojanabuamé, Jesusbe cuerpo cruzocana tbojanëstjango, chë lino entšëjuaca tbojanandmaná, y canye cuevëshiñe ndëtsbeñe pormánëshiñe tbojanjajó; chentsana canye ndëtsbé tojansjoná, y chë cuevëshoye amashjuanentše tojánachto. ⁴⁷ María Magdalena y María, chë José y Santiagbe mamá, tbojáninye ndayentše Jesusbe cuerpo tbojanjajoma.

16

Jesús tojtanaayena
(Mt 28.1-10; Lc 24.1-12; Jn 20.1-10)

¹ Ochnayté tojanopasá ora, María Magdalena, María Santiagbe mamá, y Salomé, botamana uanguëtse béjaye tmojanabuamé, chíyeca jama Jesusbe cuerpo janëtjuama; ² y tmenguse, chë semana bojatséntena, cabá cachëse, shinÿe yojábocna ora, chë cuevëshoye tmojána. ³ Imojtsaye ora imojtsayénatsëtsnaye: “¿Chë cuevëshoye amashjuanentša ndëtšbé nda bochtsabuajuána ca?”

⁴ Pero imojontješiyeye ora, tmojáninÿe chë cuevëshoye amashjuanentša bëts ndëtšbé, chentšana juanániñe. ⁵ As chënga choye tmojánamashjna y choye tmojáninÿe canÿe bobontse bën uafjantse entsëjua uichëtjoná, chë cuevëshentša catšbioica inétsotbemañe; y chë shembásenga imojouatjaná. ⁶ Pero chë bobontse tojanéyana: “Ndoñe matauatjëngana; tsëngaftanga šmondënguá Jesús Nazaretocá, chë tmonjancrucificá cha. Cha ya tontayena; muentše ndoñe quenátsmëna. Minÿënga cha enjëftsejajonentše. ⁷ Motsajna, y Pedro y chë inÿe uatsjëndayënga šmochjáuyana: ‘Jesús tsëngaftangbe natsana Galileoye echanjá. Choca cha šmochanjinÿe, ntšamo cachá tmojanëyancá ca.’ ”

⁸ As chë shembásenga betesco chë cuevëshentšana tmojésanbocana, er puerte auatjanánënga imojtsemna y ngmëmnayënga imojtsemna; y chë causa, chë soyama ndocná tmonjanianyana.

*Jesús, María Magdalénbioye tbojánebëbocna
(Jn 20.11-18)*

⁹ Jesús tojtanayenentšana, chë semana bojatsénté, Jesús natsana María Magdalénbioye

tbojánébëbocna. Tempo Jesús chábentsana canýsëfta bacna bayëjënga tojtanébuacana. ¹⁰ Cha Jesúsbioye ainá tbojáninýentsana, tojána Jesúseftaca imojánajnënga chama jaúnayama; chëngna ngménaca y šachénaca imojtsemna. ¹¹ Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninýe ca tmojanuena ora.

*Uta ustonata Jesúsbioye tbojáninýe
(Lc 24.13-35)*

¹² Chentšana, uta ustonátbioye, básefta yebnënga yojamna luaroye ibojétsaye ora, Jesús tojánébëbuacna, mo inýa cuaftsemncá. ¹³ Chora chata tbojésanshëcona chë ínýenga chama jacúntama; pero chëngna cach ndoñe ndegombre ca tmojanjuabó.

*Jesús chë uatsjéndayënga tojanichamó, Bëngbe
Bëtsabe soyëngama nýetsquénache jábuayenama
(Mt 28.16-20; Lc 24.36-49; Jn 20.19-23)*

¹⁴ Cabana, Jesús chë bnëtsana canýe uatsjéndayënga tojánébëbuacna, chënga imojtseye ora; y tojanëcácana chë cha ainá yojtsemnama ndoñe ndegombre yontsemna ca tmojánjuaboma y nýets ainánaca chábeñe ndoñe montsanošbuachema, er cha ainá tmojáninýënga chama tmojanacuntá ora, chca ndoñe ndegombre yontsemna ca chë uatsjéndayënga tmojánayana.

¹⁵ Chentšana Jesús tojanéyana: “Nýets luarëngoye motsajna, y nýetsca entšanga chë tšabe noticiëngama šmochtsabuayiynaye. ¹⁶ Nda chiñe chaojtsošbuaché y tšëngaftanga chašmojuabaye,

cha atsbocaná echántsemna; pero nda ndoñe tontsošbuaché, cha nyets tempo castiganá echántsemna. ¹⁷ Chë átsbeñe ošbuáchiyënga ndegombre soyënga imojtsabuayiynama, entšanga mëntšá mochántsetatsëmbo: atše jótšëmbonëse, átsbeñe betsošbuachéyeca, entšángbentšana bacna bayëjëngbe juabna mochántábocna; tempo chënga ndmabiyañe mochantsóyebuambnaye. ¹⁸ Masque nderado cucuatšinë mëtšcuayënga tmojishache o veneno tmojofšenga, ndocá quemochatspása; y šoquëngbeñe cucuatšënga chamojacjá ora, chënga shnánënga mochántsmëna ca” —Jesús tojanéyana.

*Jesús Bëngbe Bëtsábioye tojtaná
(Lc 24.50-53)*

¹⁹ Bëngbe Utabná Jesús jóyebuambayama tojanpochocá chentšana, celoye cha tmojtánatsbaná, y uámana luarentše, Bëngbe Bëtsabe catšbioica yojtóbema jtsemándayama. ²⁰ Y chë uatsjëndayëngna tmojánbocana y Bëngbe Bëtsabe soyëngama nyetsquénache entšanga tmojanabuayená. Cach Bëngbe Utabná chënga yojanëjabuáchana, y yojánama entšanga chamotsetatsëmbuama chë buayenana soye ndegombre Bëngbe Bëtsabe soyënga bëtsemnama, chë uatsjëndayënga bëts soyënga jamama obenana chamotsebomnama cha jtsamëse.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 21 Feb 2024 from source files
dated 29 Jan 2022
19104c0e-9046-5ff3-82fb-eb838c88dcf9